



文章 17
W82
27

一舍常分作兩程雪鞭雨袖少逢晴平生不識終南徑來
傍湖南塚子行
過了衡陽雁北迴鄉書迢遞託誰哉嶽山石鼓皆辭去惟
有湘江作伴來

黃熊嶺

黃茅迷遠近不見一人行信步未知險回頭方可驚路由
高頂過雲在牛腰生落日無棲止飄飄自問程

零陵

畫圖曾識零陵郡今日方知畫未如城郭却臨瀟水上山
川猶是柳侯餘驛亭幽絕堪垂釣巖室虛明可讀書欲買
冉溪三畝地手苦茅棟徑移居

浚溪驛

去廣右界一程

後村詩少

二十六

昭和六年二月一日贈
土岐善唐氏寄

010185188537

苔滿朱扉半闔開更無人迹獨徘徊湘江臨別如相語早
買扁舟出嶺來

全州

寂寂全州路家家荻竹扉異僧留塔在過客入城稀傳舍
臨清泚官亭占翠微沙頭泊船者多自嶺南歸

春日五絕

眼邊桃李過匆匆鏡裏衰顏豈再紅久覺胃寒疎建焙新
因血熱戒耶筒

步入西峰不見人數聲澗鳥自啼春下山欲與唐碑語先
遣奴兵細拂塵

歸到城門欲發更馬頭惟有暮鴉迎小窗了却觀書課幾
首殘詩旋補成

老懶何心更出嬉閉門終日讀陶詩湘南二月花如掃恰
似扶疎遶屋時

曉風細細雨斜斜僂僂書生屋角花想見永南僧寺裏一
株落盡病山茶

上巳與二客遊水月洞分韻得事字

勝踐造物慳貧交世情棄昔戒十客來且無一人至惟余
暨兩君鼎足坐水次歡言天氣佳誰謂風土異高吟雜騷
選序酌逮晷穉條厓去惡詩捫石認缺字古來幾稷飲傳
者纔一二蘭亭感慨多未了生死事杜陵更酸辛窮眼眩
珠翠旨哉茲日遊超然遺塵累消搖千載後尚有浴沂意
巖扉滑如玉歲月可鑄識

出城二絕

日日銅瓶插數枝，瓶空頗訝折來稀。
出城忽見櫻桃熟，始信無花可買歸。

小憇城西賣酒家，綠陰深處有啼鴉。
主人嘆息官來晚，謝了酴醾一架花。

武岡葉使君寄詩次韻二首

各紛紛載後車，誰能遠寄病相如。
雙旌已拜湖南牧，一紙猶題嶺外書。
詩句騎驢遊蜀後，情懷賦鵬弔湘餘。
若還闔郡春風暖，便擬移家占籍居。

君歲建寅豈知今，作落南人瘴來客。
病鄰山鬼

託海神目送飛鸞，偏戀土夢隨畫隼。
共行春新詩寄到如雙壁，交契寧非有宿因。

移居

鄰曲無還往，何由有別情。
惟應小窓月，長記讀書聲。

弔錦鷄一首呈葉任道

炎州產文雞，毛羽固天稟。
朱丹飾尾距，綵繡錯襟衽。
主人極珍憐，命合分俸廩。
置諸後園中，小奴司啄飲。
地荒籠柵疎，客見輒危慄。
黠狸出沒精，豪鼠窺伺稔。
諒丞彼饑涎，或矚君高枕。
駭機中夕發，果以斃來諗。
裂冠首立碎，齧索聲已噤。
酷哉三尺喙，殘此一段錦。
長嗟命瘞埋，詎忍付烹飪。
始爲支采累，終欠智慮審。
老瞞戕孔公，千載憤懣懣。
黃祖殺處士，籠暴犯流品。
况茲毒鸞物，尤索防閑甚。
善視雙翠衣，夜涼勿嗜寢。

哭孫行之

已了燈窓債，心知舉業非。
立朝多諫草，取友必深衣。
藿甕

貧時其書筒貴後稀病身偏惜淚一爲故人揮

象奕一首呈葉潛仲

小藝無難精上智有未解君看橘中戲妙不出局外屹然
兩國立限以大河界連營稟中權四壁設堅械三十二子
者一一具變態先登如挑敵分布如備塞盡銳賈吾勇持
重伺彼怠或持如圍莒或速如入蔡遠砲勿虛發冗卒要
精汰負非驟寡少勝豈繫強大昆陽以象奔陳濤以車敗
匹馬郭令來一士汲黯在獻俘將策勛得雋衆稱快我欲
築壇場孰可建旗蓋葉侯天機深臨陣識向背縱未及國
手其高亦可對徂捷敢饒先諱輸每索再寧爲誓節死安
肯屈膝拜有時橫槊吟句法猶雄邁愚慮僅一得君才乃
十倍霸圖務并弱兵志貴攻昧雖然屢克獲詎可自侈汰

呂蒙能馘羽衛瓘足縛艾南師未宜輕夜半斫寨

送陶仁父

自古送行情味惡君行快似泛仙槎新班人少先投卷下
水船輕易到家南浦不堪看草色西湖尚可及荷花諸公
若問栖栖者爲說吟詩兩鬢華

移竹

借種未定先栽竹爲愛疎聲與薄陰一日暫無能鄙吝數
竿雖小亦蕭森窓間對了添詩料郭外移來費俸金自笑
明年何處在虛簷風至且披襟

題許介之詩藁

益公稱其詩

我留鳶跼外君住雁翅邊走僕行千里敲門授一編真妍
非粉黛至巧謝雕鐫何必周丞相男兒要自傳

郊行

薄有西風意郊行得自娛山晴全體出樹老半身枯林轉
亭方見江侵路欲無何妨橋纜斷小艇故堪呼

老大

老大重登聘士臺客懷牢落可曾開臨流往往看鳶墮入
暑時時見馬來有約青山何日去無根白髮是誰栽自嫌
不帶功名骨只合眠莎與坐苔

伏波巖

懸崖萬仞餘江流遠其趾仰視不見天森秀拔地起中洞
既深豁旁竇皆奇詭惜哉題識多蒼玉半鑿毀安得巨靈
鑿永削崖谷耻緬懷兩伏波往事可追記銅柱成浪泊樓
船下湟水時異非一朝地去亦萬里山頭博德廟今為文

淵矣謂予詩弗信君請訂諸史

榕溪閣

山谷南遷維舟榕下

榕聲竹影一溪風遷客曾來繫短篷我與竹君俱晚出兩
榕猶及識涪翁

觀射

浪箭束如林傍觀笑不禁蠻平無事久卒情可憂浚各自
分牛鬻何曾貫蝨心种侯清澗能費幾黃金

龍隱洞

先賢評桂山推爾居第一豁然碧瑤戶夾似雙玉壁中有
無底淵黑浪常蕩涵諒當剖判初倍費造化力雷噴斧山
開龍怒裂石出至今絕頂上千丈留尾脊寧論兒女子壯
夫股為慄我來欲題名腕弱墨不食摩挲秋季碑文字尚

簡質今人未知貴後代加寶惜泱流工駭舟久游覺蕭瑟
富室寬如家廻權聊惕息狄武襄公平蠻碑李師中待制
宋頌在焉

哭梁運管飯丞相克家之孫

憶昔遊山猶昨日奄歸白晝隔存亡宅溪外不知何病豎
雜人爭試一方弔客傷心同瀝酒愛姬收淚各分香淳熙
丞相潭潭府今日門庭冷似霜

湘中口占

船頭吹火盧仝婢馬後肩書類士奴安得世間名畫手寫
予出嶺及湘圖
津吏沙邊立指呼放船出鎖放州符書生行李堪抽點意
苴明珠一例無

見方雲臺題壁

寄書迢遞夢參差每見留題慰所思不論驛亭僧寺裏有
山水處有君詩

祁陽道中

昨過知岑寂重來况雪天人居雞柵裏路在鳥巢邊草樹
開還閉茅山斷復連瀟江清似鏡悔不問歸船

愚溪二首

草聖木奴安在哉荒探無處認池臺傷心惟有溪頭月曾
識儀曹半面來
青雲失脚謫零陵十載溪邊意未平溪不預人家國事可
能一例受愚名

湖南江西道中十首

獨醒公子去沉湘未識人間有醉鄉酒與離騷難捏合不

如痛飲是單方

賈生廢宅草芊芊路出長沙一悵然今日洛陽歸不得招

魂合在楚江邊

少陵阻水詩難繼子厚游山記絕工斷壁殘圭零落錦

碑無數滿湘中

去年冬至投僧寺令歲陽生宿店家獨夜無人堪晤語青

燈相對結寒花

蠻府參軍髻髮蒼自調款乃答漁郎從今詩律應超脫盃

吸瀟湘入肺腸

丁男放犢草間嬉少婦看蠶不畫眉歲暮家家禾紉熟萍

鄉風物似幽詩

每嘲介甫行新法恨歐公不讀書浩歎諸劉今已矣路

傷喬木日凋疎

茫茫衰草與雲平斗氣千年不復明惟有多情蓬上月相

隨客子過豐城

派裏人人有集開竟師山谷友誠齋只饒白下騎驢叟不

敢勾牽入社來

上封已失嶽僧期客問丹霞謝不知懶到登山臨水處始

驚筋力減來時

懷安道中

閩溪瘴嶺客程賒曉泊懷安喜近家大屋書旗夸酒米小

舟鳴櫓競魚蝦溪移檝已臨高岸潮退帆多聚淺沙快着

征衫鞭瘦馬要看二十里梅花

真隱寺

出郭斜陽已在山夜淡乘月到江干
奴敲小店牢扃戶僧借虛堂徑挂單
駭浪急回因膽薄逆風小住爲心寬
投牀一枕瀟湘夢無奈霜鐘苦喚殘

乍歸九首

官滿無南物飄然匹馬還惟應詩卷裏偷畫桂州山
兒童娛膝下母子話燈前却憶江湖上家書動隔年
北戍邊城下南游瘴海頭不知天地內何處可逃愁
絕愛墻陰橘花開滿院香鄰人欺不在稍覺北枝傷
字若如天馬軒昂不可羈爲貧疎飲客因病出名姬
弛檐逢除夕檀爨共擁爐把如爲客看還得似家無
架書多散亂信手偶拈開匹似前生讀茫然記不來
手種梅無恙蒼苔滿樹身可憐開較早不待遠歸人

格力窮方進功夫老始知儘教人貶駁喚作嶺南詩

挽方孚若寺丞二首

使君神雋似龍麟行地飛空不可馴詩裏得朋卿與我酒
邊爭霸世無人寶釵去盡中年病珠屢來疎晚節貧昔共
誅茅聽瀑處溪雲谷月亦悲辛
斯人詎意掩斯丘六合茫茫不可求射虎山中如昨日騎
鯨海上忽千秋帝方欲老長沙傅尚能言博望侯回首
瀨溪溪畔路跛驢無復從公遊

挽方武成

左鉞

夔角詩名出流傳海內誇師稱起予者翁問情人邪惜未
參諸老猶堪擅一家從冷崖瀑上誰共訪梅花

壽昌

後村詩錄 三十三
山路泥深雪未乾，病身初怕浙西寒。
新年臺曆無人寄，且就村翁壁上看。

記夢

父兄誨我髭髯初老不成名，鬢髮疎紙帳鐵檠。
風雪夜夢中猶誦少時書。

杜丞

憶冒重圍入孤城，賴不亡職功何日賞。
微草至今藏舊事，歸詩卷新寒入箭劍。
江邊逢社杲髣髴各蒼蒼。

久客

久客長安市，人情薄似雲。
寧爲絕交論，不若送窮文。
白髮長千丈，黃金盡百斤。
故山春事動，深恐廢耕耘。

贈陳起

陳侯生長紛華地，却以芸香自沐薰。
鍊句豈非林處士，鬻書莫是穆參軍。
雨簷兀坐忘春去，雪案清談至夜分。
何日我閒君閉肆，扁舟同泛北山雲。

贈翁卷

非止擅唐風，尤于選體工。
有時千載舉，祇在一聯中。
世自輕前輩，天猶活此翁。
江湖不相見，纔見又西東。

題壁

兒時挾彈長安市，不信人間果有愁。
行遍江南江北路，始知愁會白人頭。

挽李尚書二首

韓范止如此，公乎事又艱。
不陪冶城廟，合殉定軍山。
璽出千官賀，弓藏一老閒。
琯戈提十萬，猶記凱歌還。

幕下多材雋于今盡策勛可憐狂處士曾揖大將軍久成
兒郎老新招部曲分此生甘寂寞有淚濕高墳

哭左次魏 墓

甫痛何郎天丘明亦復然因思題墓上不若鬪樽前劍馬
為誰得琴書有女傳惟應千載下醢食雪堂僊 君與何立可皆江淮

寄永嘉王侍郎

珍重西清老書來訪薛蘿為邦應好在 作佛竟如何花押
常荷少柑香盡坐多聞公須尚黑未守 下婆娑

秋熱憶舊遊

寒上秋光冷似水當年豪舉氣憑陵 不用炎方馬按
獵初調異國鷹山寨淒涼開戍鼓水 插落地漁燈而今

病暍茅簷底追記猶堪洗鬱蒸

哭李景温架閣 大有

挾策說荊州那知亦闇投漫招温處士幾殺杜叅謀出幕
有清議還鄉空白頭人間容不得下與阿翁遊 建寧丞相其祖也

送 約赴衢教

博 非如吏巍然道自居諸生趨避席太守揖升車朱筆
濃批卷青燈細勘書漢廷重文藻行矣召嚴徐

送張應斗還番禺

萋荔漫山霧雨繁虬鬚客子悔南轅久留閩國誰堪語却
憶番君可與言豪傑雖窮留氣在聖賢不死有書存歸時
洗換征衣了揀箇深山緊閉門

為圃二首

屋邊廢地稍平治裝點風光
要自怡愛敬古梅如宿士護
持新筍似嬰兒花窠易買姑
添價亭子難營且築基老矣
四科無入處旋鈕小圃學樊
遲

衰病歸來占把茅磨如僧葺
退居寮因存橘樹斜通徑怕
礙荷花小著橋古有功名興
釣築今無物色到漁樵可憐
歲晚閑雙手種罷蕪菁擷菊
苗

挽表叔趙君任安撫 繪忠簡孫

叔在兵間日書常笑我孱初
云機會易晚歎事功難寂寞
郎官省荒涼上將壇遙憐會
稽寔新種短松寒

蘇李泣別圖 方字若故物近為人取去

風雲慘悽草樹枯死笳鳴馬
嘶弦驚鷓起熟看境色非人
間和連山下想如此手持尊
酒別故人此生再面真無因

兒漢兒俱動色路傍觀者
為悲辛歸來暗灑茂陵淚于

孟少叔方用事白頭屬國冷
如水空使窮廬歎忠義茫茫
事往賴畫存每愁歲久嫌素
昏即今畫亦落人手古意凄

涼誰復論

芙蓉二絕

湖上秋風起擢歌萬株映柳
更依荷老來不作繁華夢一
樹池邊已覺多

池上秋開一雨叢未妨冷淡
伴詩翁而今縱有看花意不
愛深紅愛淺紅

同鄭君瑞出瀨溪即事 四首 方字若新所

汗血名駒白玉鞭本初父子
喜華鮮只今無復狂遊侶自
卸驢鞍古店前

鐵馬防秋記昔曾晚途消縮似寒蠅同時校尉俱封拜誰
伴將軍獵霸陵

北耗而今杳不知路傍羽檄走無時自憐滿鏡星星髮羞
見官中募士旗

老奴昔逐我西東捷似猿猴跳絕峰今日道旁扶一拐乃
公安得不龍鍾

明皇按樂圖

鶯啼花開春晝遲掖庭無事方遨嬉廣平策免曲江去十
郎談笑居台司屏間無逸不復覩教雞能鬪馬能舞戲呼
寧哥吹玉笛催喚花奴打羯鼓南衙羣臣朝見疎老伶巨
璫前後趨阿瞞半醉倚玉座袖有曲譜無諫書金盆皇孫
真龍種浴罷六宮競圍擁惜哉傷有錦綉兒蹴破咸秦跳

河隴古來治亂本無常東封未了西幸忙輦邊貴人亦何
罪禍胎似在偃月堂今人不識前朝事但見斷縑粧束異
豈知當日亂離人說着開元摠垂淚

卽事四首

買得荒郊五畝餘旋營花木置琴書柳能樊圃猶須種蘭
縱當門亦不鋤無力改墻姑覆草多方存井要澆蔬區區
才志聊如此誰謂先生廣且疎

目爲詩客不勝慙喚作園翁定自堪抱甕荷鋤非鄙事栽
花移竹似清談野人只識羹芹美相國安知食笋甘富貴

晚覺齊民書最要惜無幽士肯同叅
墻角新開白版扉時尋樵牧弄煙霏代耕豈若收躬稼賜
帛何如出自機湖海浪遊今已倦山林獨往未全非百年

只願身強健長爲慈親負米歸
待鑿新池引一灣更規高阜敞三間縮牆恐犯鄰家地減
樹圍看屋後山身隱免貽千載笑書成猶要十年閒門前
驀有相尋者但說翁今怕往還

書事二首

竭海夷山氣力雄只愁無術駐顏紅却須摩劃千餘歲多
買丹砂置女僮

章子云人生豈不能摩劃得二三百歲

因治陶朱術太精世間無物足經營更將郭璞書頻看只
恐青山盡鑿平

再和熊主簿梅花十絕

詩至梅花已過因觀海棠

色淡乍擣守宮紅片細俄隨蛺蝶風到得離披無意緒精
神全在半開中

薔薇難比况金沙一種風標富貴家我有公許君記取惜
花須惜海棠花

千株絳雪照滄灣應笑劉郎帶老顏尚有少年情味在戲
搜綺語續花間

鳳州宮柳昔曾攀亦醉瓊花芍藥間獨有海棠心未足每
逢多處必來看

別園水竹絕幽清花徑繁紅蘚砌青何處貴遊開步障誰
家生色畫深屏

徙倚溪亭惜墜芳恨無異域返魂香殘枝併恐風吹去挿
在金瓶置坐傍

忽憶聯鞍過水西重尋前約未參差祇愁人議風流罪屢
出看花數賦詩

淡賞無煩羯鼓催解鞍便可坐莓苔莫將花與楊妃比能與三郎作禍胎

旋挑野菜拾青梅又向花邊得暫陪各選一枝簪白髮明年知與阿誰來

君憶東湖不久歸我思陳迹恍難追殷勤為報鶯花說止有詩情似舊時

贈高九萬并寄孫季蕃二首

諸人凋落盡高叟亦中年行世有千首買山無一錢紫髯長拂地白眼冷看天古道微如綫吾儕各勉旃菊磔說花翁飄蓬向浙中無書上皇帝有句惱天公世事年年異詩人箇箇窮築臺并下榻今豈乏英雄

答惠州曾使君韻

先賢平易以觀詩不曉尖新與崛奇若似後儒穿鑿說古人字字摠堪疑

送葉尚書奉祠

先生清夢繞林泉黃紙除書拜地僊報答吾君吾相了徜徉某水某丘邊事光白傅求閒後衙似溫公約史年溫公領崇福祠十五年笑向成山猿鶴說古來晚節幾人全

答留通判元崇

不見龍驤與蟻馳紛紛蟲篆鬪蛛絲君侯傑出南方者老僕終當北面之憶玉樹枝勞遠夢熏薔薇水讀來詩自慙眼力非關令紫氣浮空惜不知

築城行

萬夫喧喧不停杵杵聲丁丁驚后土徧村開田起窰竈望

青斫木作樓 惜天寒日短工役急白捧訶責如風雨漢家
丞相方憂邊 築城功高除美官舊時廣野無城處而今烽
火列屯戍君不見高城鬱鬱如魚鱗城中蕭疎空無人

開壕行

前人築城官已高後人下車來開壕畫圖先至中書省諸
公聚看稱賢勞壕深數丈周十里役兵大半化為鬼傳聞
又起旁縣夫鑿教四面皆成水何時此地不為邊使我地
脉重相連

運粮行

極邊官軍守 戰場次邊丁壯俱運粮縣符旁午催調發大
車小車聲軋 乳霜寒暑短路又滑檐夫肩穿牛蹏脫嗚呼
漢軍何日屯 川濱營中子弟皆耕人

苦寒行

十月邊頭風色惡官軍身上衣裘薄押衣勅使來不來夜
長甲冷睡難着長安城中多熱官朱門日高未啓關重重
幃箔施屏山中酒不知屏外寒

國殤行

官軍半夜血戰來平明軍中收遺骸埋時先剝身上甲標
成叢塚高崔嵬姓名虛挂陣亡籍家寒無俸孤無澤烏虜
諸將官日穹豈知萬鬼號陰風

軍中樂

行營面面設 刁斗帳門深深萬人守將軍貴重不據鞍夜
夜發兵防隘口自言 畏不敢犯射麋捕鹿來行酒更關
酒醒山月落 絲縑百段支女樂誰知營中血戰人無錢得

後本言金
四十一
合金瘡藥

寄衣曲

征夫去時着紵葛征夫未回天雨雪夜呵刀尺製寒衣兒
小却倩人封題上有淚痕不教洗征夫見時認針指殷勤
着向邊城裏莫遣寒風吹滕理江南江北一水間古人萬
里戍玉關

大梁老人行

大梁宮中設覆屋大梁少年 結束少年嘻笑老人悲尚
記二帝蒙塵時烏虜國君之讐通百世無人按劍決大議
何當偏師 利一驢馱載送都市

朝陵行

國家諸陵陷河北盜發寶衣斧陵木或言陵下往來人夜

聞翁仲草間哭何年却遣朝陵官含桃瓊粲登金槃悲哉
人家墳墓各有主誰修永昌一杯土

破陣曲

黃旗一片邊頭迴兩河百郡送款來至尊御殿受捷奏六
軍張凱聲如雷元戎劔履雲臺上麾下偏裨皆將相腐儒
筆力尚跌宕燕山之銘高十丈

挽陳北山二首

雖拜龍圖號自稱槃澗翁生難招此老死可見文公斷簡
功夫久浚衣笑語終空餘藏藁在虹氣貫山中

掘筆臨池慣殘書映雪勤今寧無古篆宋復有唐文荒墓
周顛宅空山董相墳何時攜斗酒一酌墨溪雲

東陳寺丞築城

事變相尋智亦新
爛泥堆起石嶙峋
斷無餘力謀蒸土
頗有傍觀哂實薪
自古虛心容議者
卽今枵腹役耕民
姑尤聊攝皆齊境
莫遣郊封有詛人

答楊隼

一生忠孝發於詩
不爲桃根與柳枝
棗本流傳容有僞
箋家穿鑿苦求奇
偶全要領慙輕典
虛嘔心肝悔少時
澤畔纍臣搔白首
孤吟不敢累親知

挽陳師復寺丞二首

已奏囊封墨尚新
又攜袖疏榻前陳
小臣憂國言無隱
先帝如天笑不嗔
闕下舉幡空太學
路傍卧轍幾遺民
愚儒未解天公意
偏壽它人天此人

歲晚滄洲築草堂
却將逢掖換軒裳
市朝共歎鳳高翥
世俗或疑麟不祥
童子舉扶猶慷慨
門人要經各淒涼
衰殘無復相鐫切
遺墨常留几桮傍

辛卯滿散天基節卽事四首

老作黃冠返舊山
尚支驛料破衙官
孤臣毫髮皆君賜
獨坐風廊不覺寒

門廡無人殿未開
白頭散吏久徘徊
年年歲歲千秋節
長占羣官第一來

聞說都人競出嬉
御街簫鼓倍年時
相公入奏天顏喜
半夜揚州送捷旗

約已隆親禮不同
鈞天無燕錫臣功
太皇勳德侔高帝
陛下謙恭似孝宗

還黃鏞詩卷

曾伴靈芝湖上吟當年一悟至如今源流不亂知歸趣篇
什無多見苦心貫蝨工夫須切近膾鯨力量要雄深暮年
誰可談茲事益有村醪且自斟

題陳遂卿隱居

蚤日稱雄翰墨林暮年里巷且浮沉諸君自負遺賢媿處
士元無謗國心杜牧送薛處士序處士之名自負也謗國也子佩子衿輸少俊
某丘某水揀幽深明時莫作逃堯計忽有弓旌底處尋

題白渡方氏聽蛙亭

塘水拍隄科斗生想君亭子俯幽清黃梅雨足野田潤牡
麴煙收村墅晴莫信人嫌無理鬧頗疑渠有不平鳴畫堂
方喜聽琴阮誰愛天然律呂聲

贈鍾主簿父子

旗鈴接迹向西馳丹桂靈椿並一時競說郎君能跨竈頓
令老子欲笞兒妙年不患雖無穎前輩曾言木就規國相
晏公元楚產何須千里遠求師

讀金鑿密記

仗下千官走似麇倉皇誰扈屬車塵禁中陸九艱危共殿
上朱三苦死嗔當日橫身抗岐汴暮年避地客甌閩小窓
細讀金鑿記始信香奩屬別人香奩集和疑作非致光也

獲硯

二硯溫如玉琢成信知天地有精英馬肝紫潤尤宜沐鶴
眼青圓宛似生未愛潘郎呼作友便教米老拜爲兄今年
几案多奇獲應是窮儒命漸亨

再獲一硯自和

三硯聯翩買券成絕勝玉杵聘雲英拊摩無粟向肌起塗
抹有花從筆生韞匱每愁逢暴客傾囊或笑費方兄古來
事業由勤苦不信磨穿道不亨

貧居自警二首

昨者匆匆擲印歸六年岑寂閉柴扉歲荒奴僅拾殘穗日
晏婢方羹苦薇寧渴莫賒鄰近酒儘寒不着借來衣中年
但祝身強健要卧松風坐釣磯

客過吾廬語至晡旋營鹽酪刈薪芻酒兼麟脯不時有飯
與魚羹何處無荆公云何處無魚羹飯喫力穡勿忘家世儉堆金能使
子孫愚俗兒未識貧中樂妄議書生骨相臞

寒食清明

寂寂柴門村落裏也教插柳記年華禁煙不到粵人國上
冢亦攜龐老家漢寢唐陵無麥飯山蹊野徑有梨花一尊
徑藉青苔卧莫管城頭奏暮笳

贈馬相士二首

嫗貌何妨至輔臣猴形亦有上麒麟伏波眉目空如畫不
是雲臺劍佩人唐人嘲歐陽詢云誰令麟閣上画此一欄
荀卿初了心形者蒯徹安知背面哉別有精微書不載待
君見了季咸來

和南塘食荔歎

君欲和詩無匆匆唱首天下文章公今年荔子况倍熟亭
亭錦蓋高張空猿偷鴉啄牧童采林間殘顆猶殷紅在昔
唐家充歲貢吟諷何止杜陵翁南窮交州西蜀土快馬馱
送如飛龍絳裳冰肌初照眼玉環一笑恩光濃惟闕以遠

幸免流一顛不到溫泉宮自從陳紫無真本皺玉晚出尤
稱雄邇來鷄舌擅瑰瑋贊香馨味萬喙同麟臺仙人親題
品天為此菓開遭逢乃知微物似有數聲價亦與時汗隆
列聖儉德被華戎微如淮白不敢供奈何置驛奉私室安
得木鐸觀民風山蹊谷壑日力窮血肩跪足馳筠籠請公
移此食荔歎置在薰風殿閣中

送真西山再鎮溫陵

父老香花夾路催朱幡那忍更徘徊弓張至此尤宜弛珠
去安知不復迴海上有艘堪致粟洛中無篋勝生財泉人
畢竟修何福消得西山兩度來

題鄭寧文卷

西山作跋

昔侍西山講習時頗于雨丈得精微書如逐客猶遭絀辭

取橫汾亦恐非箏笛豈能諧雅樂綺紈元未識深衣嗟余

老矣君方少勤向師門扣指歸

西山先生編文章正宗如逐客書之類止作小字附

見內詩歌一門初委余哀輯余取秋風辭西山欲去之蓋其議論森嚴如此鄭君試以此意參之可也

悼阿駒五首

吾老方期汝亢宗愛憐不與眾雛同豈知希世千金產止

作空花賺廼翁

長兄開卷每隨聲大母繙經亦諦聽眉目分明無天法恐

緣了了與惺惺

北轍南轅有返期吾兒掣手去何之夢中玉雪來懷抱愁

絕鄰鐘喚醒時

眼有玄花因悼亡觀書對客兩茫茫情知淚是衰翁血更

為童烏滴數行

人生憂患本無涯強取瞿聃語自排吾母白頭猶念我吞
聲不敢惱慈懷

挽劉學諭

徐尤溪鹿卿之婦翁豐城人名履

少游鄉校至華顛常以藿鹽養浩然科舉法行無譽士丘
園禮廢有遺賢劉蒼下第人稱屈李漢編文後必傳聞道
諸郎皆秀孝拂雲華表看宅年

送陳戶曹之官襄陽二首

珽

丞相曾參督府謀郎君今復贊邊籌彼哉金谷飲長夜去
矣玉關防盛秋尺度豈能拘快士功名斷不在中州習池
水滿隄花艷安得相陪賦遠遊

幕府秋風事日生參軍匹馬去兼程起爲楚舞何其壯吟
退 在此行且喜峴山碑有跋不愁江表傳無名老儒

那復封侯夢止願躬耕看太平

病後訪梅九絕

夢得因桃數左遷長源爲柳忤當權幸然不識桃并柳却
被梅花累十年

鄴侯詠柳云青青東門柳歲晏必憔悴楊國忠以爲謔已

先生歲晚被人疑梅畔渾無一字詩明月清風愁併案野

花啼鳥怕隨司

區區毛鄭號精專未必風人意果然犬彘不吞舒亶噓豈
堪與世作詩箋

和靖林間欬嗽時一邊覓句一邊飢而今始會天公意不
惜功名只惜詩

老子無糧可禦冬強鳴飢吻和寒蛩舍南舍北花如雪止
嚙清香飽殺儂

與梅交絕幾星霜
瞥見南枝喜欲狂
便欲佩壺攜鐵笛
爲花痛飲百千場

一聯半首致魁台前有沂公後簡齋自是君詩無警策
梅花窮殺幾人來

春信分明到草廬
呼兒沽酒買溪魚
從前弄月嘲風罪
卽日金鷄已赦除

菊得陶翁名愈重
蓮因周子品尤尊
後來誰判梅公案
斷自孤山迄後村

題龍眠十八尊者

嘗聞天台境肉身往無從
仁夫示此圖恍惚游其中
應真一一若舊識或踞怪石
臨飛淙山鬼投牒何敬恭
又女問法尤丰茸盆魚鬢鬣
等針粟放去天矯擎空濛
山深無人

地祇出被服導從侔王公
前驅鸞獸後夔魍徐行殿
以瘦筇巉巖蒼壁謾謾松
下有老宿肩雪濃石橋滅
沒雲氣斷似是鬼國非天
工層冰融結挾怒瀑毒虺
噴薄含腥風至人于此方
入定壞衲冪首枯株同等
閑一坐六十劫汝技有盡
吾無窮書生往往談性命
怵以禍福猶兒童倒持手
版口勸進對此寧不面發
紅我知龍眠筆外意要與
濁世鍼盲聾退之云釋善
變幻愷之謂畫能神通幻
耶神耶兩莫詰與子持叩
西山翁

題林戶曹寒齋

取鄭介夫積雪冒寒齋之句

舉世爭馳勢利場
君子冷處看人忙
不營摩詰散花室
只設蘇州聽雨床
種果園林無虎守
勘書窓几有螢光
直須喚起西堂老
來向齋中伴石塘

過建陽二首

溪上重來兩鬢絲，豈知拙政久猶思。
旄倪欲見葉公面，香火共存朱邑祠。
爭勸令君持酒琖，不吝老子閉車帷。
誰言俗薄今非古，我與斯民各秉彝。
白布裙襦雪滿顛，攜扶偃僂拜車前。
皆言庾氏相，因粟猶是君侯不飲泉。
自昔活民須有備，卽今去客愧無權。
愚公老矣癡如故，長把心燈望後賢。

過章戴

曾向明時雪李邕，又聞名在聘賢中。
憶言鴟吻施茅屋，忍見龜趺立柏宮。
杯酒昔常陪賀老，雙溪終待哭喬公。
情知客淚先難制，鄰笛那堪咽晚風。

答李泉州元善

平生陳無已，白首欠吟債。
未嘗交馬呂，况肯見章蔡。
附熱生可鄙，中寒死亦快。
吾方尚此友，巾車與同載。
前瞻有膺湧，却顧有融泰。
要當堅一壁，詎可立兩界。
恕乎行誼虧，希也名節壞。
史君惠良箴，下走敢不拜。
懷哉道義交，異彼姑息愛。

送趙信州

貧者惟言可贈行，臨分握手盡交情。
馬于轡力窮時駭鷗，向機心動處驚齊士。
豈無堪客禮蔡人，便遣作牙兵。
遙知陌上羅敷女，競看雙旌出勸耕。

題趙子固詩卷

紫芝仲白俱仙去，晚秀惟君擅士林。
字肖率更親手作詩，疑賈島後身吟。
九成合奏音方備，三染爲纁色始深。
老去

尤于朋友篤未忘几研琢磨心

題袁秘書文藁

場屋聲名淳紹初同時一輩曉星疎舉人尚記前鄉貢天子亦呼行秘書出蜀詩堪編杜集涉湘文可補騷餘中朝典冊須鴻筆何必然藜照蠹魚

題廬陵羅生詩卷

門巷蕭然人迹少華裾客子袖文過織千機錦非常巧熏一銖香已覺多持贈白雲情厚矣暗投明月愧如何桃花水煖鱸堪膾恨不相攜買短蓑

送王寶之

欲去還留每自憐竟爲吾子着先鞭孤忠盡見萬言疏十口同登一葉船屈法相傳煩聖主上書俱貶愧前賢南歸定過西山下細把行藏告墓阡

鄭丞相生日口號四首

王呂紛更尚治安史韓椽伐始凋殘迺知元祐調絃易却是端平變局難

舒黯淹留守相間平津千載有慙顏惜渠不見端平相召了西山召鶴山

忤旨嬰鱗不自安明朝密啓與遷官百僚舉笏私相語相國胸中得許寬

轉了頭廳屢乞歸已將傳舍視黃扉江湖不欠魚羹飯直爲君恩未拂衣

桐廬舟中卽事

車前鸞帽同聲散關外華簪一揖休惟有浙江潮好事官

隨逐客到嚴州

田舍卽事十首

去年贏粟尚儲餅又見新秧蘸水青
野老逢人說慙愧長官清白社公靈
村落爭看烏角巾略談北事向南人
百年只有中州樂世世無爲塞下民
古來觀社見春秋茜袂銀釵盡出遊
欲與魯人同獵較可憐身世尚它州
蹴鞠鞦韆尖塵不浣臂鷹袖窄樣新裁
社中年少相容否也待鮮衣染鬢來
鄰壁啾啾誦學而老人睡少聽移時
它年謹勿如張禹帝問床前謬不知

田舍諸雛各雅馴男兒盍有藝資身
古來醫卜多名世莫學文章點泥人

條桑女子兩鬟垂車馬過門未省窺
生長柴門蓬戶裏安知世有二南詩

草草衣裝挈自隨壻貧畢竟與齊眉
絕勝京洛傾城色鏤向侯門作侍兒

兒女相攜看市優縱談楚漢割鴻溝
山河不暇爲渠惜聽到虞姬直是愁

溪上漁郎占斷春一川碧浪映紅雲
問渠定是神仙否艣去如飛語不聞

送徐鼎夫用廬陵通守博士戴文韻

一春風雨郡齋寒荒了麻姑老子壇
余嘗主仙都玉局觀吏抱文書

後村詩集 卷之五十一
排闥至客攜詩卷退衙看愁來鏡裏絲難染老去曾中錦
已殘若棹扁舟見安道爲言歲晚習申韓

送趙叔愚赴潯州理掾

未奉三雍對聊爲五筦行鄉書踰嶺少詩息入湘清遠宦
身差穩中州事日生向來幾離別此別最關情

寄徐真翁侍郎

憶昨紛紛衆喙鳴怪君噤齟久無聲得非家客留廷尉或
是閨人沮仲卿白璧微瑕終古在黃金橫帶霎時榮從來
公議無情甚莫遣蒙齋獨擅名

和仲弟二絕

一春簷溜不曾停滴破空階蘚暈青便是兒時對床雨絕
憐老大不同聽

鴈回杳杳渾無報鵲語啾啾似有憑忽得遠書看百過眼
晷自起剔殘燈

丁酉重九日宿順昌步雲閣絕句三首呈味道明府
九月南州菊未黃芙蓉取次獻新粧不妨折取繁紅插四
海皆知兩鬢霜

只了年年作逐臣衣冠縷面埃塵偶逢令尹留連我不
畏狂生點涖人

先倩清風掃水軒更呼涼月倒金樽定知明府歸侵夜縣
郭留燈未閉門

挽鄭子敬都承

重入修門兩鬢絲延和累疏竭忠規立朝頗慕汲生戇謀
國不知晁氏危老去故人能有幾古來君子例無時傳聞

近事堪悲慨說向從前亦皺眉

次韻實之二首

孤臣去國四經春迹遠安知罪尚新
蚤亦曾譏秦氏者讒為與議濮園人
懶箋光範干時宰且伴田家賽社神
醉倒不能愁世事倩他煙柳替含顰

向來歲月半投閑莫歎朝朝首藉盤
自後芬芳聊自誑眼前腥腐飽曾餐
蟲雞一笑何須較花鳥相疏恐被彈
清議自為儒者設未應羈束老黃冠

再和二首

借屋城中又一春桃符萬口說清新
向來曾上慶曆頌老去甘為元祐人
健論真堪驚諂子固窮不肖媚錢神
吾評此士西塘比後進紛紛謾效顰

與君未得便安閑邊警偏能惱澗槃
草地棗紅猶索鬪田家稻白可能餐
誰將鐵綆橫江鎖莫靠琵琶出塞彈
處處衝梯樓上舞不應諸老自巍冠

挽南塘趙尚書

自從水心死塵柄獨歸公于易疑程氏
惟詩取晦翁二箴家有本孤論世無同
不復重商推騎鯨浩渺中

次韻實之春日

梅醜朝衣塵滿靴曾穿細仗對延和
角巾久已尋初服錦帳何須戀舊窩
能讀書人天下少不如意事古來多
半生寂寂因迂濶垂老方驚歲月蹉

再和

少小從軍事袴鞬祇今廟算主通和
來復去兔三窟民

散未收峰一窩建炎有盜名一窩蜂病覺風光於我薄老知書冊誤人多罪言著就深藏所自笑狂生壯志蹉

三和

長劍挂頤刀納鞞得如曝背趨陽和買鄰底用百里價好事爭爲十二窩異日史臣應有考同時朝士欲無多與君死守西山學莫遣人譏末路蹉

四和

朱門畫鼓舞宮靴應笑狂歌似采和露坐一生無事障春游是處有行窩紹興讜議誰當續元祐金人本不多辦取九年同面壁未應末後話頭蹉

五和

頽然一榻懶中靴二月東風尚未和雀闕屋簷來作宿蜂

啣窓紙去爲窠牢愁余髮五分白健思君才十倍多欲訪東臯賢鼻祖幾迴路與醉鄉蹉

六和

生怕將軍手浣靴安能柔軟舞靈和艱虞夷甫方謀窟老懶堯夫少出窩時事繁棋如許急春愁抽繭未爲多終南一徑非常捷自是吾徒問路蹉

五月旦日鷄鳴夢袖疏幄下先君問言何事答曰猶素論也先君大息稱善聞追班聲驚寤以詩識之夢中候對殿東廂邂逅先親問答詳確磨不能移素論曝芹終欲獻清光觸屏訓誥生猶臭攀檻傳名死亦香君父臨之安所避凌晨起坐涕淋浪蔡京云如劉安世確搗磨

題趙別駕委齋

乍看華扁費尋思徐叩微言極坦夷無可奈何安命者吾
非惡此欲逃之萬羊賦祿渠前定二鳥蒙恩彼一時卻被
委齋參透了不求符竹止求祠

讀邸報二首

並驅華轂適通達中路安知判兩岐邪等惟余尤甚者好
官非汝孰爲之纍臣放逐無還理陛下英明有寤時聞向
蕭山呼渡急想追前事亦顰眉

瑤編對秉初修筆粉署同攜夜直衾虎旣蒙皮甘搏噬鶴
因瘡羽久呻吟盡歸一網機猶淺橫說三綱害最淡想到
鄧山多暇日軻書毋惜細研尋

東臯自和二首

橫身久塞楊朱路灑泣俄悲墨子岐陋矣射鉤而中者壯

哉鳴鼓以攻之侍讀自無遷府分梅詢晚年指其是日是有鬼使我不至兩府

中丞還有傲船時舒亶去國八風舞罷君恩歇羸得閑愁

上兩眉

貴豪渠已重金帶貧病儂猶舊布衾鍾阜解仇無宿憾荆

與呂吉甫解仇荆江感事有新吟山谷有荆江書事早知餘耳交

難保晚覺王何罪未深白首還鄉應閉戶斷無保社宥追

尋

和實之讀邸報四首

祝鮀非是似甚僕未爲凶鬼谷從橫舌終南詭秘蹤斷無

麟在藪獨有鼠穿墉千古誰儔匹依稀似敬宗

穿鑿彊揮塵跳梁勇執弓矯誣天亦怒驅逐國爲空笑裏

刀常有盟邊甲已衷拾遺端可拜誅佞筆生風張萬福拜拾遺王仲

書等子延英門下

外觀殊偉岸內稟極儉柔欲取漢清議盡投唐濁流鬼車
鳴甚惡猛虎死方羞芳臭須臾判哀哉不善謀

一抔初駭聽雙淚謾求哀極口誣賢者甘心譽彼哉其人嘗引

管仲見擊早知豺不食安用鴟為媒試問高陽里迎車幾兩來

再和四首

狐鳴工作祟鴉譟每為凶曾覩初尸罪丘門永削蹤謀身

真有窟鑿趾欲無墉鑿墉之趾以益其高力擊延齡去堂堂似亢宗

舊知偏下石遠避亦傷弓留落周南衆蕭條冀北空萬言

徒飾詐雙淚却由衷王績何曾醉劉蕡本不風

噬人侔虺毒害物比猫柔李義府柔而害物號入猫清議始驅逐寬恩

未放流劍誅張禹佞扇障褚淵羞諫筆非私忿倦倦為國

謀

伏閣何其壯登舟得許哀人多稱快者上豈少恩哉惡草

毋留種天桃不待媒九重方遠佞寧放鄭簷來

挽李卿儔老

苦說兵財少臣非怯塞垣上惠前語驗人嘆左遷寬老大

雲中守風寒國北門故交頭白盡空為賦招魂

洛陽橋

周時宮室漢時城廢址遺基刻已平乍見橋名驚老眼南

州安得有西京

同安

城不能高甫及肩臨風搔首一懷賢當時矮屋今存否曾

著文公住四年

龍溪道中

曠土茫茫無主名
朱門惟恐籍分明
老農猶記淳熙事
太息文公志未行

潮惠道中

春深絕不見妍華
極目黃茅際白沙
幾樹半天紅似染
居人云是木綿花

循梅路口四首

輶客紛紛露刃過
斷無微吏敢譏訶
身今自是半盆長
較爾能賢得幾何

道吏倉忙乞調兵
未應機動遣鷗驚
傳聞老子單車至
慚愧偷兒讓路行

鈔法如弓末愈張
可堪于此更求詳
祇應新執牙籌者
拾得研桑用後刀

三十年來邊徼兵
大農無計飽連營
元來有箇浮鹽策
南渡諸賢未講明

白雲庵

太行以北海豈南
我與梁公各有慙
兒五十餘親八十可
堪來宿白雲庵

東坡故居二首

嘉祐寺荒誰與葺
合江樓是復疑非
已爲韓子騎麟去
不見蘇仙化鶴歸

惠州副使是新差
定武端明落舊階
盡遣秦郎晁子去
只攜周易魯論來

豐湖三首

岷峨一老古來少
杭穎二湖天下無
帝恐先生晚年落南
遷猶得管豐湖

小米侍郎生較晚
龍眠居士遠難呼
不知若箇丹青手能
寫微瀾玉塔圖

作橋聊結衆生緣
不計全家落瘴煙
內翰翻身脫犀帶黃
門勸婦助金錢

羅湖三首

平生不作賈叻留
怪底江邊未發舟
龍吏不須前白事更
忙定要看羅浮

中州無地堪投足
垂老攜家泛瘴江
不愛朱丹畫車轂且
貪紫翠入船窓

異境微茫在半霄
僊人垂手下相招
老來尚有君親念未
敢相陪過鐵橋

扶胥二首

一陣東風掃暄羅
天容海色豁然開
何須更網珊瑚樹祗
讀韓碑也合來

前祭京師奉祝詞
尊嚴不比百神祠
臺家今歲壽邊急黃
帕封香已過時

唐子西故居二首

一州兩邊客無地
頓奇材方送端明去
還迎博士來
無盡頗縱橫
晚方攻蔡京猶稱賢
宰相應爲客先生

卽事四首

香火萬家市煙花
二月時居人空巷
出去賽海神祠
東廟小兒隊南風
大賈舟不知今廣市
何似古揚州

瓜果踦拳祝臘羅撲賣聲粵人重巧夕燈火到天明
吾生分裂後不到舊京遊空作樊樓夢安知有越樓

藥洲二首

役民如犬馬國破作降俘往往湖中石宜和良嶽無
怪怪奇奇石誰能辨醜妍莫教贊皇見定輦入平泉

廣州都試

時攝師

自昔番禺統府雄君恩暫許領元戎不羞短髮垂肩白且
愛前旌照眼紅筆久不靈妨草檄臂新無力怯開弓即今
超距多臯俊安用輜車載此翁

燈夕二首呈劉師

士女如雲服珥鮮暫陪獵較亦欣然清于坡老游杭市儉
似垂崖在劍川使指何功頌卜夜遨頭此念可通天粵人

擁道千層看不見狻鞍三十年

陌上遊人趁管絃豈知君相尚籌邊細聽野老交談處猶
記兵端未動前草市收燈如許早端門瞻蹕定何年書生
晚抱憂時志歸畫殘灰理舊編

白鶴故居

天稔中原禍朝分黨部爭當年誰宰相此地着先生故園
難歸去新巢甫落成如何鯨浸外更遣打包行

唐博士祠

博士位尤卑投名入黨碑今觀名世作多在謫官時太史
沅湘筆儀曹永柳詩新祠編最爾未盡復遺基

六如亭

吳兒解記真娘墓杭俗猶存蘇小墳誰與惠州耆舊說可

無杯土覆朝雲

再題六如亭

余既修墓立作碑或者未解此意明年北歸時此解廟

昔人喜說隆樓姬前輩尤高斷臂妃官伴主君來過嶺不妨扶起六如碑

十五里沙

只見如山白浪飛更堪動地黑風吹渺茫直際九州外濁湧常如八月時河伯豈能窮海若靈胥僅可嚇吳兒惜無散髮騎鯨友共了南遊一段奇

送項使君李約二首

世有疑香樂君侯揔未知清齋燈火夕閉閣荔支時郡小留難住民愚去始息兩年案頭筆一字不容私但見兩眉顰何曾一饌珍節如僧更苦家比郡尤貧琴鶴

均為贅尊鱸頗切身蕩山有來雁莫惜寄聲頻

送王梅州二首

州境與潮鄰徐行止浹旬瘴鄉均一氣監子亦吾民日晏煙嵐歛兵餘戶口貧定將田里事閉閣細條陳禍始自三槍菑猶被一方帝將安渤海君官薄淮陽老手何憂斷新眉尚費粧漢庭褒郡最早晚入為郎

辛卯春日

甫報弓旌召俄聞彈射攻正如飲甘露

諸不能受人惡言如飲甘露者不名

為有力大人又似斬春風雲夢吞伊輩須彌納箇中故山多芋栗不必問狙公

挽唐伯玉常卿

身自無安處昇州更廣州遂教子方去死到了翁休鳳至

虞廷喜麟亡魯野愁憂時兼悼友白却九分頭

送居厚弟堂稟二首

俱被光華遣同歸寂寞濱吾灾因抱槧子咎在埋輪記憶
煩明主招徠到遠臣要須留晚節它日白先人
怕與親朋別那堪送子行天威難俟駕秋暑勿貪程若見
知名士爲言不慧兄孤危托君相耕釣畢殘生

居厚不果行次韻二首

物色來林下安排起海濱居然蒙錦筵幸未駕蒲輪非我
瑕疵女云誰毀譽臣只愁從此去未易致虞人
祖帳方消吉公車已尼行若非露消息未免迫期程水菽
始娛母茅柴且酌兄未應天祿閣便欠一更生

送陳憲之官連州

地接湖南境孤城若箇邊茆寮愁問宿峽石善驚船官小
無迎吏詩工有續編古人高妙處不過覽山川

和張簡簿尉韻

舊案依稀在栢臺寄聲杭本莫翻開騎驢導從兩黥挾羅
爵門庭幾客來務觀可堪供史草補之不會作宮梅男兒
盍建橫行策免使君王歎乏材

送李用之察院赴潮州

昔在番禺鬻筴時瞽言不敢計從違固知國有三空患又
欲民無再推譏窮累爲生尤瘠薄牙籌所積恐纖微公卿
文學方矛盾應待囊封決是非

書事二首

潘栢考亭門人陳均福公族子皆年七十餘而客死

謙之緇髮迎歸福平甫灰釘送返莆空累兩家營後事借

留四壁遺諸孤學徒誰是單傳者史藁曾經乙覽無貧富
皆當終牖下招魂何處有神巫

二士平生極好修簞瓢之外尚何求暮年更傍誰門戶故
國無其水丘華簣殊非愛曾子短衾自可覆黔婁小車
處士差安穩十二行窩取次游

送葉士巖二首

曾約還轅訪爵羅幾廻掃榻佇經過待先生敬雖如此與
老人期奈後何走馬看花消許急殺鷄爲黍誤儂多吳中
故舊還相問一臂偏枯兩鬢皤
向來參請徧諸方恍惚如癡亦似狂雪與滕平猶未退斤
從鼻過了無傷疝花弟子知誰悟撼樹羣兒不自量極欲
爲君露消息天寒日短話頭長

甲辰春日二首

買牛搜粟向蠻煙衰病安知壁偶全使者召歸曾四輩臣
之得罪又三年柳劉漏語誰云爾絳灌憐才定不然縱使
有泉堪洗耳先生此媿若爲湔

學問過時已悍堅文章未精專薰琴何患無廢載秋
扇明知有棄捐舊讀溫卷澤不記新吟鍛鍊久方圓此生
幸不當詞翰免被人嘲上小船

題小室二首

已向淡林卓小庵是中儘可着禪龕士師何止三無愠中
散居然七不堪一去重華那復得方當盛漢勿多談近來
弟子俱行脚誰伴山僧面壁參

阡陌東西山北南半生常帶散人街何曾雲夢芥八九一

任徂公亭四三閣上大夫投欲死甕間吏部寢方酣可憐
子駿無家法下見先人面有慚

送表弟方時父

棄置空村飽世情高軒乃有顧柴荆韓甥殷浩貧親戚李
益盧綸外弟兄兩鬢蕭疏驚老大一燈明滅話平生刺桐
花下逢予季多致詩人未害清

贈施道州二首

施先生學有源流家自長安徙益州疇昔建牙當一面祗
今失國託諸侯身倚嶽麓無生計日斷岷峨起暮愁聞道
漢庭須黼黻蜀珍那得此淹留

塵突過劔門關西顧干今尚未寬早晚相如通楚道蒼
皇子美問長安拮据自笑營巢拙朽鑿明知合轍輒縱有
望鄉樓百尺淡煙衰草莫凭欄

夢方孚若二首

仙鬼微茫果是非不如遠鶴有歸期鑄成范蠡何嗟及繡
作平原未必知歌扇舞裙風雨散野田荒草古今悲可憐
一覺寒窓夢猶記聯鞍出塞時

寤寐中原獨着鞭往來絕域幾餐羶封侯反出李蔡下成
佛却居靈運先八百里烹饗軍餉九千縑輦作碑錢抵今
誰是田橫客回首荒坵一慨然

哭孫季蕃

每歲鶯花要主盟一生風月最關情相君未識陳三面兒
女多知柳七名自有菊泉俱祭享不消麥飯作清明老身
獨殿諸人後吟罷無端雪涕橫

懷曾景建

曾有春陵逐客篇流傳哀動紫陽仙安知太白長流處亦
 在重華野葬邊碎板一如坡貶日蓋棺不見檜薨年誰云
 老眼枯無涕聞說臨川卽泫然蔡季通貶道州君餞之云
 四海朱夫子徵君獨典刑
青雲伯夷傳自首太玄經有客隣孤無人問獨醒瑤琴
 空鎖絃斷不堪聽聊翁喜之手書其詩君亦貶死道州
 異矣

內翰洪公舜俞哀詩二首

憶昔端平典冊新三麻九制筆如神內庭喚作真學士晚
 輩推爲老舍人垂死遺言尤苦口平生諫疏最嬰鱗建邨
 不作于潛死誰爲君王說厚倫
 回首揚州一夢餘故交已直玉堂虛寒暄未省通君實窮
 薄空願誦子虛甚媿丈人于甫厚孰云夫子不同如君除
 中舍

舉余自代殘年無復陪精論開闔平生幾幅書

送李漕用之二首

糾飛慶曆黃華遠捷出熙寧使指新但記歐公更此職不
 知趙濟是何人爲常平劾
 富公者刻章編及孤寒士奮筆先誅聚
 斂臣自歎暮年衰颯甚羨君老手獨埋輪

漢廷鹽鐵議交攻有詔姑惟舊法從聞道嶺南歌聖主一
 如河北感仁宗向舒自是堪王佐桑孔安知富大農它日
 公歸奉清問可無鯁論贊烹封

答謝法曹

二詩簡澹掃穠華作者幾無以復加璧十五城方定價桃
 三千歲一開花選騷意度卑唐體晉宋文章讓謝家莫道
 老夫今耄矣平章此事不應差

三月二十一日泛舟六絕

少游款段何從借伯厚雞棲未易求
看取後村翁簡徑百錢聊稅一漁舟

橋低水漲過船難旋折船篷復旋安
未免屈蟠篷底坐誰教君愛切雲冠

雖沉壁馬計安施倏忽桑田變渺瀰
說與神通君看取潮頭不到艮山祠

溪北溪南一雨通山村佳處便掀篷
老身不怕無安處着在漁翁保社中

稚子呼牛婦饁耕早秧水足麥風清
老農喜極還垂涕白首安知再太平

本朝耆舊數君宗老監軒昂洛社中
後五百年人定說過

江復有戴花翁

三月二十五日飲方校書園十絕

纔入中年會面難安知白首此團欒
不妨時駕柴車出只作初騎竹馬看

伯兄迺漢司徒掾季子亦唐行秘書
只願荆花常爛熳莫令瓜蔓稍稀疏

自古根深枝葉蕃百年喬木到今存
只留諫草傳家世莫着輶車辱戶門

諸彥回以輶車給從弟照照大怒曰着此辱門戶

西舍鳴笳索賦詩東家拽石請書碑
眼中除却壺山外多是新知少舊知

呼來不許望清光麾去奚堪作省郎
莫是後身劉快活挿花重入少年場

石室十年不復開庭花無語委蒼苔席間舊客惟枚叟白
髮重將屐齒來

空留薜石仆斜陽不見奇章與贊皇何必雍門彈一曲蟬
聲極意說淒涼

百年如電復如風昨日孩提今日翁乍可生前稱醉漢也
勝死後謚愚公

早退分明勝一籌年行六十復何求東門瓜與南山豆誰
道君恩薄故侯

後有良工識苦心今無善聽孰知音老來字字趨平易免
被兒童議刻深

送王實之倅廬陵二首

芻言當日偶然同白首家山各固窮海內僅存一畏友人

聞遂有兩愚公似聞黃閣登迂叟且向青原訪醉翁此士
未應無着處棲棲十載六治中

君去江邊春色濃郡花照席萬枝紅守分風月元非贅吏
白文書但託龔黃本何堪處秦觀白麻迹已拜申公早歸
了却蘭臺史莫久吟詩快閣中

挽湯仲能二首

拔起真三秀分飛抵二難怕趨丞相熱寧忍後山寒
徒書局徂徠不諫官如何令國奕白首局儻觀
訃至聾三日悲來贖百身太丘州里化伯起子孫貧零落
歐門士消磨濮議人殷勤齋掬淚一灑素車塵

題方友民詩卷

刪定實惟曾大父文忠况是老先生力行所學斯無媿偶

發于詩亦有聲合止笙鏞成雅奏挾挑草木示微情嗟予
公事君歸興不得相從細講明

題餘干姚三錫書鈔

頃傳湯序心傾挹茲得姚鈔手闔開朱子所疑非孔傳漢
儒之罪甚秦灰時清縱未經筵召歲晚寧無掌故來攬轡
遠臣慙力薄不能爲國論遺才

追和南塘韻呈湯伯紀尹子潛

誅南浦了誅餘杭各掩新丘若釜堂不見天球在東序競
吹宮篳奏西涼後生誰附青雲傳故吏惟餘薛晉郎浩歎
縹縹雙鳳遠老身如雁漫隨陽

題蔡炷主簿詩卷

舊止四人爲律體今通天下話頭行誰編宗派應添譜要

續傳燈不記名放子一頭嗟我老避君三舍與之平由來
作者皆攻苦莫信人言七步成

九日登辟支巖過丁元暉給事墓及仲弟新阡二首

絕巔萬籟盡沉沉重倚欄干感慨深古佛龕中苔上面故
交冢上樹成陰山無白額妨幽討野有黃花且滿斟莫怪
裴徊侵暮色老人能得幾登臨

歷歷向時遊覽處重來年已迫桑榆火袞尚欲同林下華
表安知忽路隔自古曾悲摘瓜蔓卽今不共插茱萸人生
患不高年爾到得年高萬感俱

答循倅潛起

別後書稀夢亦稀忽傳尺素到柴扉不知天驥方徐步將
謂雲鵬久怒飛句律斬新過似舊姓名略是復疑非長官

僊去賓朋散存者依稀存杜微

亡友鄭君瑞為闕清宰君為主簿余始識君子縣齋

盧溪集鈔

七六

王庭珪字民瞻廬陵人登政和八年第調衡州茶陵丞拂衣去盧溪築草堂因號焉時胡銓論忤秦檜謫嶺南獨庭珪送以詩語且觸檜坐流夜郎檜死得還數召對優禮除國子監主簿主管台州崇道院九十三卒學邃于易著易解見者歎為必傳會詩獄捕至攜書鎬篋中為卒所攫去歎曰天厄吾書門人楊廷秀序其詩謂得傳於曹子方出自少陵而主於雄剛渾大此第言其崖岸爾若遺息屬辭未離窠坎使真氣蒙翳於篇句間亦未免於詩家疢癘也

題宣和御畫

玉鎖宮扉三十六誰識連昌滿宮竹內苑寒梅欲放春龍

池水暖鴛鴦浴宣和殿後新雨晴兩鵲飛來向東鳴當時
妙手貌不成君王筆下春風生長安老人眼曾見萬歲山
頭翠華轉恨臣不及宣政初痛哭天涯觀畫圖

舟次白沙

朝發螺浦湄暮宿白沙口初爲夜行計有物應掣崩山雲
四面起風濤半江吼落帆危石磯就枕不敢久林深鳴鶴
鵲村遠聞雞狗夢覺如月明破篷見牛斗起視天色清解
纜欲放滯浪頭聒天響掀簸入我牖蒲帆未及張篙師復
回首渡頭有古祠壁畫雜怪醜舟人相與言勸我酬神酒
出處本細事陰晴亦常有我固不問天豈問土木偶

張持操攜徐獻之侍郎書見訪兼出示著述中興論

諸雜文爲賦詩一篇以文軸還之他日亦錄寄獻

之也

君不能徒步上書獻天子又不能移書帝城結王公欲將
筆力扛九鼎紙上有說能平戎宣和治極久忘戰 騎
馬嘶淮甸是時猶屯百萬師無人北向放一箭大臣搏手
知何爲草間公卿兒女啼至今謀國無上策讀君斷藁令
人悲君家人物照青汗曲江猶識 亂他年論事要回
天應向荊州尋好漢

贈別黃超然

我生不識黃太史猶及諸老談遺事藍田生玉海生珠謂
君眉目無乃似誰作江西宗派詩如今傳法不傳衣句中
有眼由月脇密付嫡孫人未知宗風後必喧人口雲夢更
須吞八九他年拈此一瓣香獅子窟中獅子吼

送吳叔舉主簿往清江受納秋苗
田頭作穀催入塲一半白著輸官倉廬江主簿喜懷撒放
船椎鼓開帆檣蕭灘老農公事畢夾道歡呼羅酒漿笑言
歸去喚妻子今年租米兩平量

劉晞陽貧甚爨烟不屬書讀而不輟作詩遺之以激
其志因叙其貧之所以然冀當塗有聞之者

荷鋤初讀書中原已鼎沸輟耕仰太息衣食尚卒歲喧呼
傳點丁田廬忽湮替產盡猶索租從何出租稅廼知天寶
後信如石壕吏君門九重深旗戟森兵衛朱轡背相望莫
官察凋弊賴子天資高追琢自成器時能從諸生扣門來
問字長篇爛溢目春葩吐奇麗飢雖不堪爨要自飽風味
迺翁昔好事實客常滿位小兒聽客語炊甑忘箸單豈慮
飯成糜爾來糜亦廢誰能饋升斗與子黔突喙

寅陂行

安成西有寅陂溉田萬二千畝廢久官失其籍大姓專
之陂傍之田歲比不登邑丞趙君搜訪耆耄盡得古跡
浚溪港起堤闕躬視阡陌灌注先後各有繩約不可亂
是歲紹興十三年適大旱而寅陂溉萬二千畝苗獨不
稿民頌歌之國家方下勸農之詔法有農田水利實丞
職也然緣是而偽自增飾以蒙褒顯者世不爲怪由是
水利爲虛名今寅陂功績崇崛丞不肖自言部使者終
不及省察某出城別君東門外逢寅陂之民塞路涕泣
言此爲叙其事作寅陂行不復緣飾皆老農語也冀有
採之者紹興癸亥十月望日書

安成城頭烏夜宿啼烏未起雞登木傾村入城來送君馬
首摩肩袂相屬但有龐首不識名何物老翁出山谷老翁
持酒前致詞家住西村大江曲大江兩岸皆腴田古有寅
陂置官屬自從陂廢田亦荒官中無人開舊瀆公訟故道
堰橫流陂傍秔稻年年熟今年雖旱翁不憂田頭已打新
春穀誰云此陂會當復老父曾聞兩黃鵠嗟哉如君不負
丞躬行阡陌勸農耕監司項背只相望風謠滿路胡不聽
胡不聽寅陂行爲扣天闔叫一聲

送宣向卿往衡山兼寄

故丈招隱公有雪

明康侯侍講所居公是行錄
其歷詠諸監司

海內甲馬未盡休豪英爲時
乃相率居岩幽胡公人品
出謀天生奇才必有用何
如一汗漫久作朱陵遊朱陵

窟宅倚蒼翠此公招隱安可
爾煩誅求我聞昔時元刺史
頌其事至今人傳元道州公
爲道州績尤偉誰爲再作春
陵謳孤城疲卒捍狂賊高論
力詆庸兒蓋安得如公數十
輩參錯天下爲邦侯京洛腥
羶不難掃潢池寇孽不難收
願公早請尚方劍先斬佞臣
張禹頭

贈齊軒仲素老

并序

齊軒仲素老自安成京師遊螺川凡十餘偶過其居齊
軒面東山一峰曰秀嶺烟雲草木翠色依然真逸道人
作詩招之以代東山移文云

秀嶺明東城飛翠橫空斷煙霞五滅沒爽氣浮清旦旁連
仙人居樓殿出天半金龍蟠繡柱銀榜開琳館齊軒面青

葱下瞰綠篠岸我嘗醉其上謳吟雜悲歎一時賢士夫車
馬共遊欵當年二學士伍醇父劉偉明落筆瀉銀漢曾賦齊軒詩
字字星斗爛事逐雲雨空鬼錄尚可按重來兵火餘觸目
自悽惋惟有軒前山秀色還舊觀曉猿驚未已歸袂何必
挽胡爲走塵埃廢此奇一段山靈亦可畏移文定嘲玩

送陸景莊提幹

驅車越荆吳轍跡走欲半是時親戚多烜赫踐華貫中有
衣繡人持斧下霄漢利權多可熱冷語冰未泮徒乘朱班
輪呵殿嚇閑閑如攤帶面具應遭鬼笑玩而况新失職誰
肯聽呼喚坐令公困窮旅突幾不爨蔚然鸞鳳姿胡爲雜
鵝鸕我實憎此曹期君遊汗漫

次韻曾育才翠樾堂雪詩

哦君翠樾堂中雪詞如劍戟相磨切又如牛鐸應黃鍾水
中躍出麤賓鐵因誦東坡憶雪詩城郭山川兩奇絕翠樾
堂中雪復然敢擬片詞增竄竊長安道上醉騎驢忍凍不
知蹄屢蹶爭似淮西破賊時蔡州城外沙如月將軍一箭
射欖槍夜落城頭曉方滅捷書飛奏不動塵露布馳來迷
玉闕醉翁句律號令嚴凍口何由更開說銀杯任逐馬蹄
翻斷藁殘編且扁鐻

同陳思忠訪洪覺範

尋春反向僧房卧無乃行藏與時左起來刮目覽新詩花
壓欄干夢初破黃葉丹楓屬興深吁然莫測疑楚此惠休
島可沒已久二百年來無此作世間何處著斯人秀句天
教出寒餓我氣未衰詞頗弱欲借鼓旗聊一佐終朝巖下

不逢人苔已應噴馬蹄泥

酬聶廷夫惠所業

聶郎贈我衣短句大盤小盤推玉筯當年持此驚市人破
帽蹇驢誰借譽厭聞百鳥呼春風自作綵鳳鳴孤桐俗聞
惡語敗人急胡不謁帝明光宮

次韻張子春賦瑤林春色

余瑤林洞中以醱醲作麴
因為酒名

花間酌酒送明月月照金樽佳興發鯨吞霧捲百川空醉
挽醱醲落雪便將壘麴築糟丘醱醲壓膏麥為麴釀成
忽見張公公子家居近丹關為予乘興誇洛陽笑指沙
頭卧雙榼陽視此真草野敢欲新詩借牙頰瑤林名字
出風塵未知音那敢說况能大讀離騷句痛飲雖多不
為餐未識家碧玉香鬢東坡真一訣誅茅本結方外

人豈用禮法相分別預拂瑤林一片石與君醉過清明節
窮亦不足悲達亦不足說酒闌挿劍怒肝膽正恐不免論
功業

和陳柄臣見贈

此人愁聽江南曲細草新蒲幾回綠當年避初渡南千
官蒼黃飯不足中原亂後又逢春邊頭只道無烟塵邇來
公卿不生事此事必屬非常人我曹生長江南樂豈料翻
成風圭惡湖海元龍氣尚豪贈我新詩何確錯拾遺後出
最能交條椽大屋今荒墳遠孫高材淹管庫猶能落筆生
烟雲山賊相遇初相喜共論大梁人物美莫學夷門抱關
吏謀竊兵符椎晉鄙

李仲孫佩軒

盧溪集抄

我友李仲孫飭身一何介被服古衣冠昂然偉而怪開軒
蓬戶中紉蘭以爲佩布袍挹公卿脫幘卧江海方其得意
時天地不能碍荷鋤入深林剪薙發幽蒼清芬動窗壁蕙
若連光彩君看紫綬翁腰垂黃金帶璜珩錯琺瑯印章如
斗大步趨踏龍尾鏘然中音會豈如此香草擢秀繁霜外
秋風落萬木臭味久逾在我思軒中人免食三斗艾夢寐
欲見之一往清鼻界

送駱世武

淵明不喜加腰趨寧作拄笏何易于勸農使者鄙丈夫少
年新進安祇渠下馬怒頰虬奮鬚指揮星火飛文符詈辭
愧語靡不無諸公止欲求薦書椎斲肌骨尋膏腴公爲一
笑憐其勉熙朝成法字已字堅如金石莫可無鞭且勿施
安用蒲三年竟亦無逃逋吏民遮道相歡呼生立叢祠傷
佛區想當逸氣吞江湖與人恢疏無怨吁臨邛小子傲鄉
閭方乘朱輪呵道衢公歸西山結茅廬丹崖絕壁巉空虛
誰能負弩當道隅終日與爾爲前驅

觀徐明叔畫湘西磨崖圖

廬在湘西白鶴峰紀官軍破賊

衡山高出北斗邊九疑蒼梧相屬聯羣峰環走如却立山
脚插入瀟湘川朱陵渺邈迷處所白鶴噴薄飛流泉坐看
徐郎拂絹素盡驅山岳置眼前徐郎豈是真畫手酒酣遊
戲乃其天巴陵洞庭連浦淑鯨鯢蟠穴爲賊淵詔謂將軍
出旗鼓樓船蹴踏驚浪喧櫓檣夜落照湖水雕弓十萬猶
控弦湘西古寺最奇絕丹崖翠壁開何年况公文章善叙
事大字怪偉宜鑱鐫中書異時觀落筆因頰吮墨圖凌煙

孟公韓公毛髮動腰鞞大羽冠進賢他年中典事可考公名亦與茲山傳

題惠崇畫秋江鳧雁

老崇學畫如學禪中年悟入理或然長江未落鳧雁下舒卷忽若無丹鉛定自維摩三昧裏半幅生絹開萬里不用并州快剪刀斷取鐵圍山下水

處豈非慧力中所得圓熟故耶

往年見趙德之說惠崇嘗自言我畫中年後有悟入今觀此短軸定非少年時筆也故詩中云爾

雅歌樓詩送永豐宰鄧晉卿

潢池赤子弄庫兵犬牙蟠接虔漳汀十年烽火照縣郭白晝不敢問衙庭忽見青樓臨大路樓上高歌揮白羽樓前解角看投壺終歲不聞櫓戰鼓主人坐笑已風流小婦鳴箏樓上頭曲罷仍能雅歌舞送君此舞傳中州

贈寫真徐濤

并引

世言畫工喜作鬼魅謂荒誕易圖也故傳神寫照為難聞徐濤畫盧溪老子作幅平鞋蕭散之狀見者以為甚似作詩求之

徐生畫人不畫鬼點目加毛必佳士邇來下筆更逼真勿論山僧及童子會貌詩人孟浩然便覺灞橋風雪起如今儻欲畫盧溪一菴宜著淡巖裏

戴國和得潘衡墨法於言意之外今攜之湖湘必有識之者作詩以送之

老潘膠法秘不傳君獨得之乃其天此法髣髴如叅禪忽然有省夜不眠又如神仙換骨法應手不自知其然湖東大帥天下賢詞源如海筆如椽本是玉堂揮翰手正要此

物供磨研醉題李白三百首掃盡將軍九萬牋老潘歿來
知幾年聲名始落瀟湘川君不見呂洞賓竹絲籃子烏紗
巾長安市上無人識喚作湖西賣墨人

和酬黃子默

牛渚西江夜新聲月下聞定知終夕詠不覺曉光分儻有
樽中酒重論日暮雲山林正樵悴抵掌忽逢君

辰州上元

畱滯遠湘浦飄如雲水僧來爲萬里客又看一年燈翠憶
褰珠箔高樓俯玉繩鰲山今夜月應上最高層

入辰州界道中用頌子韻

路入荒溪惡波穿亂石跳騎驢行木杪避水轉山腰倒挂
猿當道橫過竹渡橋吾生本如寄歲晚尚飄飄

憶馨鴻二孫

余竄夜郎日二孫纔三四歲阿馨已誦得數部書兼寄
書紙來阿鴻尚幼余甚念之作憶馨鴻詩寄令誦之
憶汝何時見愁眉此日舒別來三換歲誦得幾多書字稍
堪拈出翁今喜有餘阿鴻纔弄筆相對想軒渠

江上

倚杖江風起呼船水面開人從州背渡帆破浪頭來月色
共千里天恩徧九垓當年送客處待看客車回

謫辰州

得失真何事文章妙入場隱身三十載汗簡幾千張名落
江湖外氣干牛斗傍吾衰任飄泊朝夕渡沅湘

春日山行

緩鞚青絲馬不嘶春山草長靜柴扉
遊林新笋斑斑出隔水幽禽款款飛
雨過泉聲鳴嶺背日長花氣撲人衣
雲藏遠岫茶烟起知有僧居在翠薇

避亂淡山家兄寶君寄牡丹數枝鮮妍不減平日始
覺茅簷頓有春色感歎之餘因成拙句

鄉井彫殘屋瓦頽東風依舊上池臺
別來縱值時方亂春到何曾花不開
驟覺茅簷堆錦繡未消翠輦走塵埃
勿云去草草無惡今日遮藏要草萊

再過東岡

物色江寒楓葉凋江邊微雨暮蕭蕭
白沙翠竹舊行路碧水朱欄新渡橋
盡室當時避征戰十年閒事付漁樵
如今傑屋明人眼一笑端能覆酒瓢

和胡觀光登酒樓

李白夜登孫楚樓樓中玩月苦淹留
定知公等非比客要是人間第一流
玉勒穿花回曲徑銀槽瀉酒注深甌
遙觀翠幕張燈處少婦鳴箏坐上頭

和居東村作

山中有西泉寺故基

避地東村深幾許青山窟裏起炊烟
敢嫌茅屋絕低小淨掃土牀堪醉眠
鳥不住啼天更靜花多晚發地應偏
遙看翠竹娟娟好猶隔西泉數暖田

題郭秀才釣亭

野澗江寒一雁飛碧蘆花老鱖魚肥
遶欄綠水秋初淨滿棹白蘋人未歸
醉任狂風揭茅屋卧聽殘雪打蓑衣
他年欲訪沙頭路會自攜竿扣竹扉

送胡邦衡之新州貶所二首

囊封初上九重關，是日清都虎豹閑。
百辟動容觀奏牘，幾人回首愧朝班。
名高北斗星辰上，身墮南州瘴海間。
不待他年公議出，漢廷行召賈生還。

大厦元非一木支，欲將獨力柱傾危。
凝兒不了公家事，男子要為天下奇。
當日姦諛皆膽落，平生忠義只心知。
端能飽喫新州飯，在處江山足護持。

次韻周公子秋日書懷

酒酣下筆不能休，寫盡江南萬斛愁。
長史果為何物漢中軍，不是置書郵。
又聞戰馬將休息，且任浮鷗自去留。
觸目西風易增感，山川信美莫登樓。

向文剛讀書齋試雙井茶有懷黃超然雙井老人嘗以青沙蠟紙

裹細茶寄人不過二兩今復見之

黃蠟青沙未破封，已知雙井社前烘。
一丘風味極不淺，萬頃煙波興不窮。
東晉書齋頽壓後，西湖山色有無中。
危欄傑閣明人眼，獨覺登臨欠此公。

從叔君冕見訪山間，自云平生躬耕釣，無求於人中。

有至樂令某作詩寫其蕭散之狀為賦此篇

青鞋布襪綠簑衣，滿日秋江白鳥飛。
小楫扁舟乘興出，斜風細雨釣魚歸。
有間茅屋臨蒼巘，尋箇樵夫上翠微。
閒趁牧童吹短笛，倒騎牛背入柴扉。

次韻劉升卿惠焦坑寺茶用東坡韻焦坑因東坡始見重於時

日出城門啼早鴉，杖藜投足野僧家。
非關西寺鐘前飯，要看南枝雪裏花。
玉局偶然畱妙語，焦坑從此貴新茶。
劉郎

寄我兼長句落筆更如錐畫沙

送歐陽廣明遊仰山兼簡慈書記閣中有小釋迦金襴袈裟

士窮不作儒生酸歲晚聊為物外觀行脚僧從幽徑出集雲峰倚半天寒且攜幾緡登山展勝走高門坐馬鞍君見堂西舊書記試求開閣看金欄

送任子嚴江西運幹

正坐懲羹吹冷鑿送君那復有新詩明朝便恐隔千里抱病何由把一卮西蜀文章自家法江南烟雨上樓時東湖滕閣多佳興落筆端能寄所思

次韻郭偉節段延直見寄辰溪古夜郎郡大白嘗謫焉

山霧未忍勒銘移空有寒鴉噪竹枝二妙相逢春霧裏老夫將窟夜郎時傳看尺素雙魚尾突過黃初數子詩不上

沉江探奇絕平生誰肯一來茲

春晚同石子文遊歐陽參軍園問其主人已物故獨

一老婦開門亭檻幽雅醱醑方盛開因歎二年卜居隣曲巷有朱扉未許墻東宋玉窺春草滿池驚晝夢醱醑萬朵壓繁枝湘西江上叅軍宅黃四娘家子美詩他日

沅陵尋故事為余收入楚人詞

閏十二月自城東泛舟遷居城西安福寺舟中微雪

朔風吹雪江上來急槳迎風蕩不開渡口雲藏伏波廟山腰霧失楚妃臺移居自作泛舟樂抱甕還如載酒回歲晚浮家寄何處兩溪春水綠如醅

劉時舉主簿相別三十年忽相遇於沅湘之間古夜

郎郡也郡索窘俸饋不繼垂橐而歸相聚月餘賦
詩爲別

謫仙適竄夜郎道主簿歸從飛鳥邊但喜騎驢得佳句忽
忘揮麈是何年且將肚束三條篋敢望腰纏十萬錢剩斬
湘南幾竿竹他時分我釣魚船

送頓子還廬陵

頓子遠來夜郎省余聞其婦方卧蓐不欲久留而戀戀
不忍去乃令上沅湘至昔人窺九疑處得下武陵溪入
荊州由巴陵武昌洞庭黃帝張樂之野觀開闢以來造
化肇出瓌雄怪譎之處却由瀟湘以歸弊廬作數語示
之明日乃行

東歸未辦武陵舟送汝翻成一段愁雪點弊裘騎瘦馬春

寒幾日到荊州湖山天開洞庭野吳楚月明黃鶴樓莫苦
回瞻白雲嶺是行聊學子長遊

次韻李宜仲見懷朱崖夜郎二逐客

不因貴賤識交情此段當令後輩傾三友一龍吾作尾同
時四海孰爲兄殊方少客通南北厚祿無書訪死生萬里
歸期應可指九衢先聽賣釵聲

辰州僻遠乙亥十二月方聞秦太師病忽蒙恩自便
始知其死作詩悲之

辰州更在武陵西每望長安信息稀二十年興緝紳禍一
朝終失相公威外人初說哥奴病遠道俄聞逐客歸當日
弄權誰敢指如今憶得依稀

次韻段季裕惠詩

身墮西南海角邊是中樂事亦天全
漸聞長樂鐘聲近正遇巫陽放
放年客過茅蓬非率爾詩如錦
繡益飄然一罇豈盡平生話咫尺
高樓起暮烟

初至行在

望中樓閣入青冥疑是長安舊帝城
千里荷花開世界幾年羈旅望神京
老隨丹詔身猶健夢入華胥眼尚生
行盡沙河塘上路夜深燈火識昇平

胡邦衡移衡州用坐客段廷直韻

朱崖萬里海爲鄉百鍊不屈剛爲腸
復出光芒動星斗定隨雷雨起江湘
歸期正待春回鴈賀客爭持酒滿觴
笑說開元丞相宅淒涼偃月上標堂

送頌子歸廬陵

西風吹我夢魂驚送子東歸無限情
好往沅湘探奇絕遠看衡嶽正崢嶸
黃昏渡口呼船急後夜江頭望月明
能把愁心寄明月雲開時到夜郎城

次韻周穆卿教授兼簡黃元授司戶

嘗記楓宸賜異恩同時人物亦訖訖
從前百事不掛眼初得微官便退身
教授才華欺蜀錦參軍詩句似唐人
中興勳業歸公等顧我徒爲避世民

次韻歐陽廣明以詩送鉢孟

方丈盈前送八珍山人不是此中人
試尋僧鉢齋厨近更喜園官菜把新
秋滿城頭看落葉風吹酒面已生鱗
何時共過溪邊寺雪夜扁舟發興頻

贈胡紹立

并引

八盧詩集卷一
一四
紹立頃年遍遊西南諸州聞余竄夜郎冒重險至沅陵
由湘南以歸已卯秋預清江高薦復至安成訪別道舊
賦詩因以送行

憶昔烏蠻絕塞亭巴娘歌罷月三更重尋湘水江邊路又
見蕭灘榜上名此去飛騰對天陛不應顛顛困書生將軍
三戰成功後未數焚舟老孟明

謝向提刑見訪

并引

某自貶所東歸伏辱提刑直閣千里命駕來訪死生感
激高義輒成長句聊伸謝懇

夜郎逐客遇生還秘閣老翁來扣關坐聽犀揮妙言語慚
非欄具偉衣冠高名業已照六合賤子窮當隱半山陸納
家風元冷淡口將茶果薦杯盤

渡湘千里憶分攜因誦癡兒不了詩送我出門還作惡今

朝會面豈前期樂天獨往青山日裴相閑居綠野時從此

功名恐相逼伊山安得久棲遲

李訓王涯排陷樂天訓等死日樂天正游洛下青龍寺有詩云當君白首同歸日是我青山獨往時或謂白公樂禍東坡云樂天豈樂禍者特悲之耳余今亦然

和讀書臺入夜卽事

池底星光箇箇添半鈎斜月吐纖纖數聲寒笛西風下人
在朱樓捲暮簾

兵火之後家藏墳籍蕩然寄居江村欲借書諸公先

寄此詩

卜築江村翠嶺坳喜君書室近衡茅牙籤插架幾千冊準
擬從頭借一抄

聞道藏書埒石渠仍能一讀五行俱不妨借我遮愁眼勝

著閒窓飽蠹魚

次韻盧元贊江亭卽事絕句

江水磨銅鑑面寒釣魚人在蓼花灣雲開貪看新月上不覺小舟流下灘

次韻劉英臣早春見過絕句

春至盤蔬有蕨芽紙窗竹屋自成家客來清坐不飲酒旋破龍團潑乳花

雪中遇胡烈臣歸自郴陽戲成一絕

路傍有客騎牛過乞與蓑衣作蓆眠邂逅若能相顧問和公畫上釣魚船

和康晉侯見贈

儒生無力荷干戈亂後篇章感慨多但拏筆頭吟白雪莫

挑馬箠渡黃河

次韻陳君授暮春感懷

雨餘山鳥百般啼煙隔桃蹊一線微南北東西春總好杜鵑何苦勸人歸

董仲儀來夜郎訪死生

雪糝鬼葬山頭路霧失鬼門關外村不謂故人千萬里忽攜書冊夜敲門

次韻酬國子生趙秀才

淵明五柳非無宅子美西枝自有村堪笑長安近時客紛紛騎馬傍誰門

竄居夜郎雪中杜門數日不出忽郡中送春來始知

今日立春

東風來從幾萬里雪擁江梅未放花忽見土牛驚換歲始知春色到天涯

郭仲質南窓

東風吹月下長汀窓外雞號天粹明時有諸生來問字隔江猶聽講書聲

夜坐聽沅江水聲

雨過風林生夜清坐邀明月正關情漁童酒醒莫吹笛要聽一江秋浪聲

寄子老

并引

子老自江西來赴沅州報恩謂必取道辰陽翹俟久之忽得書乃趨徑路去已開堂矣奉寄絕句以當相見也半程蹉過夜郎溪不到昌溪問路岐空使辰州亭下客隔

江招手立多時

贈別陳君授

并序

紹興十九年余坐詩語竄夜郎偶太學生陳君授前二年上書言事忤秦太師意亦貶居是州二十五年冬秦太師病死遐方未及聞聖上慨然施曠蕩之恩盡放流人某與君授始獲生還感恩出涕作二絕句贈別

十載投荒坐獻書忽逢飛詔下荆巫歸來好上昇平頌已死姦諛不足誅

雷雨沅湘振滯冤皇恩普出九重天乞兒猶戀權門火應謂死灰能復然

離辰州

逐客休嗟行路難歸鴻心在杳冥間初驚草尾千重浪險

渡湖頭十八灘
行盡黃茅白葦叢舉頭忽見兩三峰青青畫出湘天景如
覺身離蠻蜒中

次韻任子嚴 并引

余竄夜郎日惠門僧祖麟徒步萬里訪生死東歸過其
寺見壁間題詩乃故人任子嚴見懷嘉麟之義而嗟拂
之也時士方以詩爲諱而覩此作感激次其韻
解訪江南處士廬行藏正自與時迂題詩更及夜郎客此
段如今絕世無
君是石渠東觀人小邦聊見宰官身山僧似不孤題品衆
角叢中有一麟

次韻周孟覺記皮老人事 皮老九十餘歲能談熙豐以前事但稍聾耳

百年人物已無餘况說銅人鼓鑄初欲著承平舊時事政
須此老助潛夫
何物靡眉一老翁能談慶曆至熙豐只應坐厭聽鞀鼓到
處逢人說耳聾
人壽何曾有百年再逢甲子換新元眼明重見清平日自
可治聾聽好言

贈日者張谷

余竄夜郎八年東歸至長沙遇日者張谷考十年前所
言皆不謬余雖老然壽則非君妙術所得而推故末句
云

夜坐吟詩竄夜郎君將何術考休祥近來偷得西華法不
敢煩君算短長

夜郎歸日答葛令惠詩
七載投荒萬里餘交遊半作曉星疎
門前梅柳換新葉忽得故人相問書

避亂鵠湖山贈寺僧

岩下逢人說亂離十年眼底壓旌旗
塵復暗江南路堪羨山僧總不知

初寒方葺火閣而會溪城周子康惠竹簾火爐竇公
端惠蒲團便足了一歲無事矣作二絕答之

細柳將軍來護塞夜郎遷客正窮居
火爐恰恰簾垂地足了三冬讀我書

戶外霜風入骨酸誰塞紙閣問平安
正憂坐客寒無席遺我新蒲入突爨

漫塘詩鈔

七七

劉宰字平國金壇人紹熙元年進士歷江寧尉真州司
法泰興令以浙東倉司幹官告歸監南嶽廟累召不起
隱居三十年卒謚文清宰以吏事稱而淡於榮利一時
朝廷所不能致者宰與崔與之耳詩亦常調而五言古
稍優

次王兄韻

野徑梅初發寒塘草又生能來同社酒莫笑瓦盆盛

過尤溪

尤溪塘上征人路記得停驂一解顏
十載重來兒女換似曾相識有青山

過剡溪

青山叠叠水潺潺路轉峰回又一灣想見雪天無限好不
妨獨棹酒船還

題石門奉真觀

叠障爲屏石作門陰雲漠漠雨昏昏清游到晚不知去要
上峰頭望曉暎

舟中

蓼岸著花紅半吐稻畦過雨綠平鋪炊煙起處三家市却
向江湖憶畫圖

秋懷

一抹紅綃日脚霞千林暮靄納歸鴉西風捲盡梧桐葉乞
聲與中庭散月華

雲邊阻雨

薔薇籬落送春闌笋甚園林早夏間牛背牧兒酣午夢不
知風雨過前山

謝趙使君豁租

長榜朱書又墨書使君頒令豁逃租一千里內歡聲滿十
數年來此事無

得軒卽事

上印還家不計年水光瀰望木參天綠雲洞裏嘗名漫塘上爲綠雲
天開書幌紅錦波心漾酒船

送鄭節夫

盛年已去壯心闌此別懸知後會難願使乾坤同日月不
妨闕浙異江山

發紹興

留滯青春晚經行此日初柔條桑着眼短穗麥生鬚竹外
雲埋屋花邊水遶渠箇中容我老官遺子公書

馮公嶺

地隘山逾峻人勤俗不奢時培石上土更種竹間茶接畛
田成篆連筒水濺花征塵如不到老我卽東家

長林海邊道上

海霧曉逾合海風春更寒衰顏欺薄酒老膽傲驚湍叢竹
人家近平沙客路寬明朝應更好山翠撲征鞍

松江道中

久作松江夢重來泛短篷淡雲飛急雪枯葉戰狂風煙末
三家市波心一釣翁鴟夷身計耳吳越等成空

寄同年朱景淵通判六首

念昔從子遊金陵佳麗地幕府盛賓僚東南稱兩尉子才
清而通我拙世無二櫟社雖輪囷靈根同晚歲

當時最少年雪林紫芝翁詩名三十年正復坐此窮落日
澹平湖宿草鳴寒蛩何時一樽酒往醉與子同

謂趙紫芝汝序

四海游夫子粹學洞古今聞善亟推輓常恐力不任時危
係長才白日已西沉拱木戰寒風淒其千載心

謂游默齋九言

茂苑子周子慷慨憂時危斯文晁董荒炳炳日星垂言深
衆所驚用淺才不施穹窿山下笛懷人究誰其

謂周正字南

滕子嗜古學萬卷作生計孤燈耿夜闌盜畏不敢睨至寶
世不售虛名竟何利尚想古城隅幽花開繞砌

謂滕質

細柳真將軍勁氣可立慄向來拯時危功畧天下半屢詔
不宥起出處懸自斷十載山澤游萬念春冰換何當求識

面介子同里開

謂周馬師處

題王荆公半山圖

歸來心事平蹇驢踏秋風舉鞭問髯奴何如浣花翁道旁
幾高松風來自相語桃李今何之歲寒予與汝

題茅山潑墨池慶雲庵

路轉幾山腰地尋雙海眼澗落呂公泉橋橫蜀道棧主人
去不歸山空春事晚何時具蔬筍開門延客飯

北固山望揚州懷古

北固城高萬象秋煙竿一縷認揚州試乘綠漲三篙水要
見朱簾十里樓淚濕宮衣朝霧重愁薰寒草夕陽浮隋堤
舊事無人問兩兩垂楊繫客舟

懷林維國

予學宦金陵得三山林維國邵武任伯厚吳門朱景淵
婺女葉潛仲爲之友相得歡甚維國知我愛我視他友
爲甚惟恐予有過差一夕四人相會於潛仲解舍抵足
達旦始各自誦所短而誦人所長終也自言其長而誦
人之短遞相規益其友愛如許維國去金陵未二年終
於永嘉予亦離羣索居無復朋友之益辛酉十月初五
日夜忽夢與維國遇如平生歡覺而悽然成二詩

四海論交二十年知心一見似前緣情親尚記通宵語忠
告難忘送別篇夢入蓬壺重會面座看書史尚堆前應憐
廢學從農圃要使留心在簡編

尚記升堂拜母時滿前兒女競牽衣鳳雛想見今成立雁
序遙聞已奮飛

維國弟成已
已發浙漕解

身後聲名終不朽家傳詩禮

足相輝傷心白下金陵道無復班荆話昨非

寄潘子善上舍

時舉

陳少陽率太學生伏闕上書六賊遂退天下快之少陽
猶以後書論李邦彥白時中等言不用拂衣去近傳太
學伏闕書是歟非歟非山間林下所得知獨怪朝廷不
用其言諸君猶苟安於學豈以靖康時事視今日緩急
異耶為賦五十六字質之同志者

少陽一疏折羣姦拂袖歸來日月閑誤國小人

書中語

猶法

從叩闕諸子自賢關是非煩亦通千古義利那能立兩間
若向西湖浮畫舫好傾卮酒醉孤山

送邵監酒兼簡儀真趙法曹呈潘使君

儀真來往幾經秋風物淮南第一州山勢北來開壯觀大

江東下峙危樓沙頭縹緲千家郭鱸尾連翩萬斛舟去去
煩君問耆老幾人猶得守林丘

和張寺丞謝惠河鮑韻

先生盛德信光亨微物將誠愧晚生春岸正當餘雨過寒
江尚想小舟橫一奩走送慙遲暮兩舍相望欠割烹未必
甘芹解知味王公當諒野入情

送王去非入餉幕

春歸花藥尚紅酣送子脂車馬在驂幕畫向來多實用事
機今可付常談學方用力須千百事或當仁勿二三別後
欲知漁釣處五湖天水共澄涵

送衛汝積歸句曲

汝積歸路過獨樓岡入亭子谷二處相去里許而下瞰

數百里丘陵川澤若錯綉然谷中縈紆峭險下有流泉
疑有幽人勝士嘗建樓岡上以極臨眺着亭谷中以貯
幽勝以其亭多而樓獨故曰獨樓柳子厚所謂游之道
二曠如也奧如也此蓋兩得之歲久樓傾亭廢而名尚
傳若鐵壚步然山居皆樵蘇之人無能解其義者遂意
獨樓爲髑髏而以谷爲孔是又與小姑嫁彭郎同義吁
可嘆也因汝積路出其間爲辨證以刷是岡之耻
樓岡亭谷萬山西縹緲炊煙出翠微歸路正當清晝永離
懷莫悵白雲飛學醫要使人無費問道須知昨已非好向
庭闈商畧此短章中或有玄機

仲玉和前詩見贈因再用韻

官倉出粟徧東西多謝朱公念隱微但覺閭閻猶菜色不
知園囿已花飛當年國論無同異此日民言有是非天上
鴛鴻方刷羽海邊鷗鷺已忘機

漫塘晚望

霽色催雲作晚霞小橋却立岸烏紗雨餘菱芡新抽葉秋
早菰蒲未着花燈影微茫行客艇鐘聲縹緲梵王家沉吟
索句輸公等我欲臨流理釣槎

寄陸大夫

寄語金困陸大夫歸田相府竟何如提兵劫取已非矣縱
火燒殘豈義歟百口喪身端自爾千錢酬直殆欺余放翁
舊隱佳山水賸好歸歟理故書

社日僧舍風雨

借疎香積共晨炊客裏良辰總不知孺子從渠均胙肉南

翁無處聽巴詞神鴉得志飽終日巢燕有心來及時風雨
聒人聾轉甚半鍾濁酒可能治

寄題戴氏別墅

聞君築室水雲鄉一榻翛然獨老龐近挹荷香供几案遠
邀山翠入軒窗自歌自笑遊魚樂時去時來白鳥雙何日
過門成夜泊一樽相與對銀缸

趣劉聖與

用行寓玉甫桂墅

門外平湖百頃寬庭前翠竹遠欄干鳥啼花笑四時好八
淨窻明六月寒賸可琴書供晝永不妨絃管到更闌留行
莫爲歌楊柳作計應須趁牡丹

送戴子家歸永嘉

林

君住柵溪第幾山我家北渚水雲間二千里遠來非易三

五朝留勿作難有子已知頭角異安心寧恤髻毛斑尺書
頻寄問無恙共樂生前日月閒

癸未寄王甥

別時庭戶正秋清劃見園林翠織成吳下余思頻刮目渭
陽子豈遂忘情堤間飛蓋分垂柳水面浮舟約半萍乘興
時來共清話相望能隔幾牛鳴

開禧紀事二首

泥滑滑僕姑姑喚晴喚雨無時無曉窻未曙聞啼呼更勸
沽酒提壺蘆年來來米貴無酒沽
婆餅隻車載板餅隻有味婆可食有板盈車死不晚君不
見比來翁姥盡飢死狐狸嘍骨鳥啄服

謝烏鵲

朝來不成寢啼鳥繞西東似欲叱我愚無虞終有凶挽衣
行太息飛鳴鵲當空似欲慰我心正直神所容舉手謝烏
鵲憂喜當何從吉凶兩不到我在阿堵中

松風軒晚望

遠山亞歸雲近山留夕照澄江橫淨練怒風收衆竅東南
佳山水此地宅其要連甍三萬家金壁互輝耀閑房列歌
舞傑觀富登眺物理會有極却慮成悲嘯我家三茆峰一
室倚青峭下有荆溪水水深魚可釣歸歟有成計靜坐觀
衆妙功名付公等連茹祇明詔他年問無恙短策寄嶺嶠
浩歌暢幽懷狂斐君勿誚

和李果州

道傳

同遊茅山贈

我家荆溪東矮屋八九間石田人不耕自占水一灣十年

去城市樂此清晝閑飽聞西州英奧學窺孔顏見賢豈無
時冰開水潺潺榻來絜齊俟一語開冥頑錦機神所秘啓
視不吾慳追隨妙高臺勇往不作艱蹇步駢弗前逸駕杳
難攀惆悵默無言詩卷慙空還三茅在何許天末聳髻鬢
勝處不可窮老我常窺班幽人去不歸夜鶴守松關夫君
金玉姿秀氣超人寰興來得同遊句就知難刪應同太史
筆有副藏名山

趣劉倅聖輿建第

鷓鴣巢枝寬大鵬溟海窄不齊物之情小大貴安宅一區
楊子雲衡宇陶彭澤何妨輪鞅稀所憎塵市迫吾宗攜家
來寒暑已屢革寓舍得賈區開門卽廣陌四鄰共壁立而
無藩墻隔晝通燔炙芬夜悉笑語啞麇至僮賓朋雨立愧

減獲傳聞三徑地經始得長策良材蔽川下賤售非難索
露廩發陳積香飯留匙白羣工闔戶外拱手聽規畫願速
大厦成却展搏風翮

次聖與小兒啖虎脯篇

折臂最小兒骨聳顙微廣弗說螺螄小可以吞大象那敢
謂其然且幸日稍長顧似陶家郎智識殊不爽強令侍師
席跳踉繞函丈胡能辨滋味舍魚取熊掌但見蔬果列攫
取如技癢嘉餽得虎鬻新獵出林莽對之懶下箸殺氣猶
可想呼兒食之既睥睨尚來往饜餐我所羞跌蕩或稱賞
服猛豈渠能過獎謝吾黨深慙如敝帚有誤千金享

走筆謝王去非遣餽江鱸

環坐正無際駢頭得嘉餽鮮明訝銀尺廉纖非黃尾肩聳
乍驚雷腮紅新出水毛以姜桂椒未熟香浮鼻河鮪愧有
毒江鱸慙寡味更咨座上客送歸煩玉指飢餒雜青紅百
巧出刀匕翩翩鶴來翔粲粲花呈媚頗疑壺中景髣髴具
盤底又疑三神山幻化出人世更於屬饜餘想像無窮意
知君束裝冗不敢折簡致厚賜何可忘因筆聊舉似

再韻爲鱸膾虎鬻解嘲

多病早休官自是臺無餽東門享鷄鵠寧若龜曳尾有酒
可斟酌有力給薪水朗詠淵明詩如斲郢人鼻所期免朝
飢敢幸嘗異味大哉來鄰邑細縷出纖指一見喜折屐三
息食失匕珍非我可常竈非吾敢媚胡可狗口腹有若囊
無底諸君有用學士直足經世龍肝與鳳髓何求不滿意
此豈費萬錢正自不難致貴賤理則殊氣味固相似

分韻送王去非之官山陰得再字

達官須親民未竟法應再昔君治姑孰報政甫初載桃李
春正華風木養不待至今田里間往往誦遺愛薦章交公
車夷塗了無礙自詭更治民得邑仍勇退坐看積薪上笑
謝及瓜代赤縣官山陰銅章喜重佩平湖帶城郭崇山鎮
溟海道中勤顧接何者非勝槩鵝池湛清漣蘭亭霏翠靄
溪流西走剡夜雪曾訪戴此地若故家舊遊詳往載公餘
信足樂俗敞良可慨盜賊人關狠淫祀家禳禱緩縱固不
可激之或生害厥田惟中中厥賦上上倍豪家窘輸送勺
合無容貸貧家慣逋負符移費追逮行之苟失中上下交
怨懟臺府相鼎立征求常意外稽違速譴呵抑絕虞冒昧
犴獄當盡心夜寄或百輩去來不敢詰猶豫卽招悔譁徒
陷平民更欲

臯朝方得其情莫祈當路改過客紛如

織刺口說行在丐求小不愜百計工組績我知夫子心此
去專勞來豈其懾聲勢左盼而右睠然須處心平更須臨
事耐勿恃事理直抗論多慷慨勿謂氣類同不虞趨鄉背
先入勿偏聽未信勿忠誨少違歲月間足致治平最庶策
三載勳亟應千齡會

贈江西吳定夫

定夫江海士瘦骨如矐仙翩然及吾門不假左右先我方
厭塵埃一笑喜相延肩懸兩破囊旣見始解纏我欲具杯
酒割鷄烹小鮮自言乃長齋不受世葷羶少林入西山幽
尋徧崖顛山空四無人白眼問青天洞口得老翁守死易
一編高談慰寂寞其然豈其然去去不忍別解衣示勤拳

及歸已彌旬爲我少留連道逢一病媪背僂兩足攣津頭
見羈旅數口依敗船料理窮晨昏奔走環市屢足攣不良
行結廬依墻垣船敗不可航買舟捐萬錢爲慮極靡密要
使終安全詰旦擬東還旣夕重周旋嗟子塵外客而結區
中緣吾衰不能爾愧汗與涕漣或疑破囊中探用若流泉
子豈費長房一壺挂簷前或疑瞿曇老濟世法無邊勤君
爲此來■頸警沉綿君師魯東家二說當捨旃理一而分
殊先儒有遺言君歸更商畧書來慰殘年

送魏華甫侍郎謫靖州

靖州風物最五溪畬田歲入人不飢淘沙得金邀以嬉瘴
煙不逐嶺雲西六花瑞臘春臺熙尤便逐客過往稀理亂
黜陟了不知夫子豈欲居九夷要尊主勢扶時危有言不
用時我違番然不受好爵縻向來鄉行誰可睎平生易名
慕者誰蘇陳凜凜百世師畏塗萬折甘如飴求仁得仁固
其宜大明當天照隱微直前一疏可忘之江頭後會端有
期暗香微動寒梅枝臨別不用長歎咨

石翁媯

采石江頭風晝息掀天雪浪平如席沿涯小泊客心寬攀
蘿曾看望夫石天涯望斷人不歸露寒猶想淚霑衣爭似
石翁攜石媯年年對峙夾岡道人歸人去我何心雨沐風
餐人自老比翼鳥連理枝年多物化徒爾爲長生殿裏知
不知

鴉去鵲來篇

昨日鴉鳴繞庭樹道上行入色驚懼試呼行者問如何身

爲戶長催殘稅殘稅自昔稱難理三年尤非四年比加之
逐保有逃戶每一申明官長怒人逃信矣田不逃其奈逃
田不知處厥初經界失區畫比近立租相什伯大家置產
錢欲輕小家鬻產價欲增上田只割下田賦賦存田盡因
逃去或因土瘠遂流移歲久田侵人不知更有鄉胥迫科
抑多推少割隨胥臆民愚而神難盡欺往往增入逃戶籍
以茲逃戶日增多戶長蚩蚩奈若何向來差役多輕重戶
長之中中產衆比來里正多義役各欲供須有全力搜羅
中產無子遺戶長人家四壁官司禱雨徧明神施行寬
政蠲房緡房緡僅可寬遊手那得實惠需農民千錢代輸
猶可出今日方輸又明日父兮母兮叫不聞遺體鞭笞同
木石日日鴉鳴期會到血洒公庭深不掃遂令着處聽鴉

鳴魂飛魄散心如擣和氣致祥垂致異已甘旱魃來爲祟
忽驚鴉散鵲交飛高枝報喜仍低枝萬口歡呼聲動地府
今盡放三年稅曳鈴走卒天上來立張大榜當衢市黠胥
駭愕頓兩足戶長仰天攢十指瘡痍未愈失呻吟感激過
深仍涕淚又說新租亦寬限四年舊欠寧不爾亦知經賦
難追責少紓庶可容催索使君從善真如流仁人之言爲
慮周畫諾一時良易易幾人共拜更生賜人意會同天意
感急足未回時雨至始知此術勝祈禳開闔陰陽俄頃耳
何妨甘澤尚愆期我作此詩禱告之象龍可仆蜥蜴縱蛟
龍自起霹靂隨謂予不信難強語請驗吾邦今日雨詩成
欲謝更有祈新租輸送此其時分科本色歸上戶細民勿
使折納遲四年逃閣尚充數積弊那能倉卒去且應除豁

見真的孰恃強梁敢逋負若然民病八九瘳閒暇何妨版
築修推排得人敞可見逃租十失五可收更令義役廣前
制戶長里胥同一體庶幾二役適均平不使貧民偏受敝
豈惟澍雨快一朝縱有凶年皆樂歲報喜不惟乾鵲噪丈
人屋上烏亦好

野犬行

嘉定己巳作

野有犬林有鳥犬餓得食聲咿嗚鳥驅不去尾畢逋田舍
無煙人迹疎我欲言之涕淚俱村南村北衢路隅妻喚不
省哭者夫父氣欲絕孤兒扶夜牛夫死兒亦殂屍橫路隅
一縷無鳥啄眼犬啣鬚身上那有全肌膚叫呼五百煩里
問淺土元不蓋頭顱過者且勿嘆聞者且莫呼生必有數
死莫踰飢凍而死非幸歟君不見荒祠之中荆棘裏鬻割
不知誰氏子蒼天蒼天叫不聞應羨道旁飢凍死

猛虎行

市有虎毋妄言當關虎士森戈鋌市上一呼人駕肩虎雖
猛那得前市有虎言非妄君不見左馮諸邑天下壯斧斤
聲斷林壑空猛虎通衢恣來往食人肉飲人血沈痛積冤
何可說凝香堂上紫煙浮風流太守憂民憂一朝下令開
信賞籍皮枕骨彌山丘虎已滅人患絕夜永猶聞泣幽咽
泰山之側如何居子後夫前甘死別

運河行

運河岸丁夫荷鋪聲繚亂紅蓮幕府誰獻言運河泄水由
函管函管掘開須到底運材歸府供薪爨庶幾一壞不可
復民田雖槁河長滿民田爲私河則公獻言幕府寧非忠

我聞此言爲民說急趨上令毋中輒小民再拜爲我言
管由來幾百年大者用錢且十萬小者半此工非堅厥初
銖積費民力厥後世世期相傳豈但旱時須灌溉亦憂久
潦水傷田向來久旱河流絕放水練湖憂水洩州家有令
塞雨管雨管雖存誰復決小須雨澤又流通雨管猶存不
費工只今掘盡誰敢計但恐民田從此廢豐年餘水注江
湖涓滴不爲農畝利有時驟雨浸民田水不通流禾盡死
況今農務正紛紜高田須灌草須耘盡驅丁壯折雨管更
運木石歸城闕呂城一百二十里不知被擾凡幾人太守
仁民古無比凝香閣下寧聞此願傳新令到民間雨管須
塞不須毀已填雨管無尾問人船通行水有餘雨管不毀
民歡娛異時瀦瀉無妨渠憶昔採詩周太史不問小夫井
賤隸試哀俚語扣黃堂鉄鉞有誅寧敢避

殺虎行謝宜典趙大夫惠虎皮虎腊虎睛

君不見陽羨周將軍射殺南山白額虎千古萬古聲流聞
又不見宜典趙大夫南山三十有六虎令行殺取無復餘
一虎昔何少三十六虎今何多虎多人不患所患政之苛
苛政滅人門猛虎戕人命擇禍莫若輕泰山之人論已定
大夫性高明下令走風雨所知在田里了不見臺府旣令
民免政之虎又與民除虎之苦四境之民歌且舞或云殺
虎太傷和胡不令渠自渡河我聞此言笑且呵大夫憂民
憂豈必限吾土不然鄰國以爲竊信也白圭愈於禹古陽
羨今宜典大夫邑之主將軍邑之賓主賓多寡事不同千
古萬古同清芬

用前五字韻趣劉聖與建第

君不見茅屋下四壁淋敷窄又不見朱門中金碧鎖空宅
宅成更欲致良材水浮陸走空山澤茅屋區區誠已疎朱
門汲汲彼何迫勸君勿學伏波老自詭裹屍須馬革又勿
學金谷人綺窻阿閣綿阡陌但令庭宇潔頗與塵囂隔市
聲不至亂琴書厨煙可免衝咽啞庶幾家人安亦使我心
獲吾宗開敏姿富有濟時策棟宇著易象義不假探索

義豐集鈔

七八

王阮字南卿豫之九江人朱子講學白鹿洞阮從之遊
慶元初孽臣竊柄附者如市阮未嘗一躡其門晚守臨
川陛辭奏事柄臣密客誘致之迄弗往見奉祠而歸其
詩得之張紫薇安國故不為徒作有義豐集

代胡倉進聖德惠民詩

平楚皆膏壤成湯忽早年人知聖慮切恩遣使臣宣乙卯
饑荒後長沙富庶全紀年四十載斗米二三錢潭州自紹
興五年一
早後豐稔縣縣人煙密村村景物妍朱蹄驕柳陌金鐙麗
三十八年花鈿長沙自唐號小長安習此民成懶加之吏不虔力耕
朱蹄金鐙杜甫所云終苟且勸課或遷延綠野田多曠潢池惡未俊曷嘗修稼
政但見飾賓筵豐稔時難保盈虛理有還自應成赤地安

得咎蒼天義廩真良法平皇家以備先積倉何止萬存數

僅餘千潭州每歲正苗三十八萬石每石收義倉一斗自乙卯至辛卯當有百萬石臣到任點檢僅存四萬

石濫以疎庸迹來司斂散權一身初抵此四顧但茫然奏

發常平弊財蒙內帑捐敢云呈敏手幸免奮空拳茂問秦

輸閉專稽稷懋遷陸修流馬運水作泥舟連凡屬災傷事

淡將利害研兼并勤告諭商旅漸喧闐市直雖翔踴官收

却痛蠲北來因鼎粟南至出渠船分路招糴廣未自靈渠出稍稍收成

廩紛紛出著鞭起於衡嶽趾環厥洞庭舫湖北疆參錯江

西境接聯里雖千萬遠身亦再三遄必務經行遍滾防賑

給偏規模頒郡吏出納謹鄉賢敢避風兼雨周爰陌與阡

有時沉水底鎮日上山巔不復通舟楫寧容坐馬韉屐多

穿石及裳慣濕河壩江步時時到村虛日日穿楚語以江岸為步村

市為虛救頭方甚急援手詎辭胼疔昔雖多病馳驅却自痊

已成迷曉夜不復憚山川松徑行時蓋楊花坐處種光華

雖備使蕭散類登仙林密花頻剪途窮木可緣石欹行恐

壓溪漲涉疑旋昔出正初吉今經六下弦以正月出弦七月還司奔

忙馳似箭來往轉如園王事歌苞杞歸心却杜鵑力雖疲

險阻志務報陶甄憶昨初行日蕭然亦可憐餓羸皆偃仆

疾疫更牽纏詎止家徒壁多遺屋數椽葛根殫舊食竹米

繼新饘去冬人食葛根今春又食竹米略救朝昏急終非肺腑便聲音中

改變形質外羸孱氣茶胸排骨神昏眼露圈步欹身欲仆

頭褪髮俱卷婦餒心成疾兒啼口墜涎亂花生目睫炎火

亢喉咽裊裊渾無力昏昏只欲眠盡攣持耒手頓削負薪

肩狀貌已成鬼號呼幾亂蟬獸窮思曠野魚困想清泉山

僻無人到惟驚有使寨初聞爭欲走稍定使來前爾俗饑
雖困吾君施體乾知民方疾苦遣吏撫迺置院收鰥寡
分場賑市廩貸糧招復業散種使耕田臣嘗乞以米五萬石依條給貸四等
以下戶又以穀三萬石分諸縣借給寒給衾裯暖給紙春頒藥劑煎凡今嚴
吏責皆是恤民編稍見兒童集徐看父子牽共爭扶杖聽
咸樂置郵傳茶獻迎門禮香浮夾道煙耳聞身鼓舞心切
涕潺湲坐定徐言此從來未見焉一時愆潤澤萬里奏艱
鮮灌溉非無枯精虔亦有捨畚乾終損粟池涸竟枯蓮詩
駭周宣魃經書魯國螻坐令民皞皞翻作泣漣漣平日安
豐稔今朝乍疾顛老羸如病馬壯健若飛鸞忽見皇恩沐
親馳使命專聽言初挾纊拜賜悉鳴絃新歲天心格經時
雨勢綿東皋耕澤澤南畝溜濺濺坎豆皆勤作根涯悉勉

旃水耕榮啐啐陸種茂芊芊件件絲盈軸方方麥薦籩楚語

以種物為坎豆勤苦為根涯以疋為件以三升為一方指知食欲動目望酒先捫舍

北行歌暢村南伐鼓淵魚占何必夢斗覆已明躔甲子晴
尤好嘉平雪記填自今知歲歲王道永平平撫已叨逢主
占星幸備員耳親聞擊壤手敢廢題牋農事修其職邦基
賴以堅但令倉廩實何患犬羊羶商克周饑止邢存衛雨
愆定知豐稼穡端在講戈鋌足食繫兵法行糧詠雅篇願

陳王朴論一稔遂平邊王朴邊策一稔之後可以乎邊

上九江唐舍人文若一首五十韻

江左承南渡潯陽控上流平時稱用武今日更防秋六代
規摹古三江險阨周高憑隆屏翰下瞰握襟喉呼吸聞吳
楚封疆蠹斗牛循良渡虎跡神武射蛟遊勝事餘蓮社風

光足庾樓倚天開峻極倒影湛飛浮鼎敗香山往官輕靖
 節休義門十世美將業二王優頃歲承平久斯民習俗修
 究心依學校服力事田疇獄淨苔荒砌山溪麥掛丘共知
 忠義篤宥陷矯誣羞不料腥羶起能令日月幽雲屯滿赤
 縣天意卒鴻溝郡邑生荆棘江湖識冕旒竟指形勢地聚
 作虎狼陬紹興初李成盜此昔計何勝辱羣生亦暫偷奇功思赫
 赫內治頗悠悠法令中間弊流移不可留經界法行始有交居之弊產去
 稅存德安一縣歲逃移千七百戶未經真撫恤還已困虔劉對壘緣淮甸
 長蛇致逆亮入寇其臣有欲首取江州者雷聲忽天狗旗尾又蚩尤
 隔岸幾航葦孤城亦綴旂兵戈閑耒耜戰艦奪松楸閩官之擾
 民不得耕戰船之才多伐民墓天下雖同擾江西又不侔宿師惟此地西
 獨此履畝倍他州曹翰洗江州獨全稅諸將紛紛是攸司日日

培文符競効午膏血罄誅求戰鬪連年永瘡痍幾日瘳孽
 牙中作梗日甚氣習遂成媮情動穿墉鼠風行借父耰俗風
舊淳帝為輟近侍人喜得賢侯父子文章偉君臣契分授王言
 資潤色國是仗謀猷詩似丘傳鯉書如固續彪鳳毛宜鸞
 鷲驥種自驂騮增重依蓮幕尤煩借箸籌折衝皆婉畫賜
 履又分憂奕奕長江上源源數路頭若非煩柱石何以鎮
 龜貅南土驚新事西清擁碧油春風迴野色江月靜簾鈞
 地借長城望塵清奕世讐有生皆固結無士不冥搜公下
始即問立國須才用聞公銳意收龍門如可上敢請與荀
 儔

和陶詩六首 并序

古詩不和唐始有之亦未有追和古人者雪堂先生始
出新意盡賡淵明詩彼誠有感云爾隆興二年余浮家
東吳僦居日糶大水入室無所容其軀妻孥嗷嗷至絕
煙火羈旅憔悴之態如雪堂之在嶺外而淵明之棄彭
澤也由是官情日薄而歸意日濃矣暇日淵明詩不能
盡和也事類意感輒繼和焉懼觀者不我赦也故序其
意云

和歸田園

皇天亦愛我生我匡廬山勉承父母志功名期少年既無
取日手遠去窮虞淵又無謀生才廣有負郭田富貴兩不
諧胡爲乎世間眷言剪原居宛在瀑布前野曠易得足
虛常帶煙行歌紫芝曲醉上香爐巔念此百年身有此足
以閑若乃不決去使彼山悽然

和飲酒

竹門固無鎖俗客自不開而欲挾彼態使我變所懷鄉原
善同俗於德則有乖乃知違世人所貴在幽栖客有愛我
甚命駕來衝泥憐我與俗異欲我與世諧甚知客言是甚
知余心迷淵明飲酒詩賡以遺客回

和乞食

淮陰漂母事不謂身見之長歌淵明詩益信非虛辭嗟余
客長安十載無休期一飽不自足况敢謀酒卮曳裾富兒
門丐食酬一詩達于公卿間喧喧謂余非雖知責我至終
亦無所貽

和貧士

善集身錄 五
吾聞戴安道不對王侯琴當時豈不能低眉求賞音一曲
朝得聞千金夕得尋捨之不肖顧輕重得所對小人一時
快君子百世欽貧士繫此辨士乎當正心

和雜詩

遑遑行路難汲汲艱食迫井田邈不再兼并蔽阡陌永懷
先父祖遺我以清白出門無所容疑此天地窄秋風瘦遙
山涼意愜行客江南記舊遊不歷岐王宅

又和

淵明棄彭澤歸歟在柴桑我里亦其側俯視世批糠顧瞻
無所憂所憂在絕糧敢辭躬耕勞耒耜山之陽惜哉命之
窮仍歲螟螣傷去為游手民足跡已四方拂衣却歸去焉
用祖離觴

同張安國遊萬杉寺一首

寺有昭懷御書

昭陵龍去奎文在萬歲靈杉守百神四十二年真雨露山
川草木至今春

重九再到張已隔世書詩牌後一首

碧紗籠底墨纔乾白玉樓中骨已寒淚盡當年聯騎客菊
花時節獨來看

昌國偶成

諸邑皆山可夜馳海中昌國力難施風潮阻渡連天地期
會申嚴限日時願以老身從此免忍將人命逼諸危交門
山下須臾死肉食諸公知不知

留別昌國五首

妄意絃歌學子游迄無三異比中牟丁寧今夜東風雨添

起潮頭急去休

全家雖脫海波危舊治無人詠十奇孤奉明恩顏似甲却
嗔兒女笑嘻嘻

三山月淡白銀闕九老春閑紫石宮出十洲記此去能爭幾多
地恨無仙骨到其中

當時底事乞身歸萬物何曾與我違最是臨行更腸斷海
鷗猶自掠船飛

扶桑曾見日騰空老去歸田不復東一覺短簷他日夢起
來惆悵曉窗紅

昌國秩滿次陳糾祖行韻

昔之督郵逐彭澤今之督郵眷昌國不令自賦歸去來更
以新詩祖行色開緘墨濕雨濛濛細讀字字含清風塵埃

三載足昏塞一聽妙語還醒鬆持歸柴桑有茅舍揭之其
間作佳話非惟可託陶淵明亦愧當年督郵者

題四羊圖

三百維羣世不見迺以四羊爲一圖人言此圖出韋偃不
知韋偃有意無巖巖參天一古木下有輕蕘滿郊綠雪髯
隱約黑暈中沙肋微茫筆端足昔聞韋侯畫馬工杜陵長
歌歌古松孰知畫羊更如此世間絕藝誰能窮蘄春太守
好事者珍藏有此希世畫嗟予得見雙眼明此一轉語久
難下三羊游戲芳草茵一羊輒登枯樹根安得添我作牧
人爲公鞭此一敗羣

丙午寒食題淨土寺

方見繁紅綉小園已隨流水去村人於醞醖真無分雨

共歎飄似有冤投老故應諸事懶問春能得幾分存不須
更作匆匆散更把松梅子細論

再遊用前韻

十年不到此祇園又爲支郎暫出村犬認行蹤增踴躍燕
驚離恨苦埋冤鬢邊但覺新絲長壁上惟餘舊墨存但問
桑麻添幾許世間萬事不須論

上巳日鴈又阻風呈宋彥起

往來定是一年一時節長逢三月三天氣未佳宜且住樹
猶如此我何堪花飛與客渾無與酒好招人只自慙安得
惠風和暢景與君方權看淮南

長風沙次宋丈韻

已將身世等河沙又泛春江看浪花錦纜牙檣若送酒蓑
衣弱笠我浮家淹留日覺青春暮飄泊風兼細雨斜安得
崑崙能探水試教來奏小琵琶

都下病起呈王樞密

不解彫蟲賦逐貧又無饒舌論錢神遭逢此鬼今番瘧零
落吾生有限身舊學試溫渾易忘新書欲謹自難真時危
壯士乃如此爲報堂堂有位人

瓜時有感

籬邊方對菊花黃又報文移出草堂三宿敢云桑下戀四
翁終願橋中藏泉縈去路常低咽酒向離亭不肖香聖代
多才焉用我明年重上乞身章

謝趙宰拜襄敏墓并留題二首 并序

惟先襄敏公受知烈聖神文之時學古入官獻太平時

制書名在第一裕陵伐叛受命西征闢國萬里全師獨
克百年夢奠丘墓幽遠無有知者知縣趙公多識前言
往行獨深知之奉詔出宰實部九原乃因勞農特枉三
步盡尊賢之意存追古之心風示諸侯事關政教非特
先烈感遇而已某不肖既獲躬執耒耜被撫田間又獲
奉承薦酌感泣墓下敬賦二詩跪謝下執

班春故事亦年年公獨推誠遠布宣麗日借黃催麥壠惠
風吹綠散秧田衆魚入夢蓑衣下異雉飛馴桑蔭前好詠
十奇歸樂府聖朝方採下民篇

河湟人去鎖春蕪三步遙勤一束芻盛事撥揮千古烈英
詞噓動百年枯故家零落今朝遇此段孤高近世無地下
結成無限草待公肅甲破幽都

送沈侍郎

重入修門已有期趣裝聊此着征衣帝思宣室名儒對人
喜元都舊客歸高節不難全晚歲亨途未必盡危機願公
且爲蒼生起莫向茗溪戀翠微

題嚴陵釣臺

并序

題釣臺多矣大槩高之爾未有明其意者也光武既定
天下深懲王氏之禍原於張禹孔光之流故昔之所謂
坐論者一切吏之時或叱咤侯霸等俛首而已先生道
高千古豈能堪此雖以禮聘不以禮答項枕卧語又從
而躡踐之使知己之不足驕士卒不少留古語云使騏
驎可係而羈兮豈云異夫犬羊此則先生之志也其首
陽之流乎爲賦小詩以發千載一笑

西都庸庸生禍胎東都切切繩公台平生故人苦畏辱坐
定白雲那有來沉幾濶略滿帝腹且憩先生一雙足使知
天上麒麟兒不似犬羊甘豢畜涓濱老叟不自持爲人人
以鷹名之豈識桐江一竿竹依舊秋風魚正肥古來賢者
亦避世往往適逢天地閉得如建武亦不惡又值首陽難
降志山木陰陰江面寒此天別在壺中寬幾曾流出桃花
去寶氣自駭人間觀當時不願世知已稱到于今却如此
塞馬得失天好還千駟齊侯不窮理

出郊訪沈洞主

抖擻塵埃暫出郊一藤先訪羽人巢風翻翠浪催禾穗秋
放殷紅著樹稍萬里家山懷五老千年活計却三茅明朝
便好乘風去不學浮屠更打包

瀑布二首

吟詠瀑水衆矣大抵比况爾未有得於所見鑿空下語
爲興詩者大白獨曰海風吹不斷江月照還空氣象雄
傑古今絕唱而疑是銀河之句亦或比焉戲述二篇興
比各一

造物小兒不任事一天元氣從淋漓雲中雨降自應爾山
上水行誰激之幽林洶洶虛籟作赫日粲粲寒光垂謫仙
獨步得興體此外篇篇俱此詩

萬仞青空不可攀天將飛瀑掛其間一雙玉塔倚絕壁兩
道白雲騰半山覆器以欹嗟魯廟設匏而建笑秦關春風
一卷出山去萬里青秧抱甕閑

題高遠亭

小攜樽酒作清遊行到方壺最上頭山在斷霞明處碧水
從白鳥去邊流苦無妙句窺天巧賴有名亭慰客愁從此
江南添勝景未應獨數庾公樓

泛舟

雪川荷葉浦彭蠡石榴頭此地皆奇絕平生所爛遊從來
貪水國老去只漁舟更有乘桴便何人從我浮

龜父國賓二周丈同遊谷簾二首

偶然得意挹珍流二妙欣然共勝遊怪得坐間無俗語谷
簾泉水建茶甌

一飲清冷體便輕絕知真液是長生歸來世事都忘盡惟
記白雲堆裏行

蓬屋

長簷十尺庇堂東疎漏從來盡是蓬日影碎如秋葉下雨
聲灑似夜船中竹因蠹盡多垂地箬到枯時半掩空此處
想非人所競衆雄應是不來攻

出豐城

搖搖旌旆出洪都彌望田疇認廢墟羸馬不前身突兀耕
夫相視笑軒渠倚松茅屋斜開徑近水人家半賣魚蒲葉
向冬猶未割臨風遙憶路溫舒

龍塘久別乘月再到奉呈同社

在姑蘇

龍塘疇昔擅雲煙破月重來倍爽然浮玉北堂三萬頃扁
舟西子二千年青山識面爭迎權白鷺知心不避船華髮
脩脩更何往一茅終在此橋邊

再用前韻

已無功業上凌烟且泛扁舟逐討然自喜茲遊勝平日不知今夕是何年橫空蝮螭聊欹枕蒲袖嬋娟永共船同社賢豪多載酒坐添清興浩無邊

姑蘇泛月

夜來誰共泛靈槎飛上牽牛織女家但覺滿身私雨露絕無一點世塵沙秋將寒玉清風陣身借鎔銀潑浪花投曉歸來互相告等閑休向俗人誇

都昌公檄黟歛遇春

忽忽年華換悠悠客路長春聲先水響山氣欲花香何補公家事空隨吏役忙白雲知此意一片直都昌

湖南道中二首

已分餘生老一丘尚因微祿少遲留夢魂不待山資足先

入江南問釣舟

萬疑千崑我一家別來空自鎖煙霞閑雲不放行人望故向東南角上遮

題淡巖

浯溪已借元碑顯愚谷還因柳序稱獨有淡巖人未識故煩山谷到零陵

陳彌高惠詩次韻言謝

南來日日訪人才始得清詩副所懷我計已戒桴入海君行初似橘踰淮十年旅夢思乘興千里征塵忽及堦見說又爲勳業去獨能無意侶洪崖

勸農題吉祥寺

傍石尋幽徑窮原得梵城湖粵四面合山色一團清農合

巡門勸僧煩倒凝迎明年吾更健來伴此中耕

劉致政家東岡池蓮甚盛昔嘗飲焉賦此叙別二首

一枝曾吸碧觴杯萬丈潮頭心見催斜倚闌干獨惆悵明年應是不能來

世路東西自此分酒樽何日再論文虎蹲山下一回首望斷東岡是海雲

